



THE JUBBALAND STATE OF SOMALIA

T DASTUURKA

TUSMADA

CUTUBKA 1^{AAD}:Dawlad Goboleedka Jubbaland ee Soomaaliya	9
Qodobka 1 ^{aad} : Aasaaska Dawlad Goboleedka Jubbaland ee Soomaaliya	9
Qodobka2 ^{aad} : Sarraynta Sharciga	9
Qodobka3 ^{aad} :Mabaadi' da aasaasiga ah	9
Qodobka 4 ^{aad} : Diinta	10
Qodobka 5 ^{aad} :Dadka	10
Qodobka 6 ^{aad} :Dhulka iyo xuduudaha	10
Qodobka 7 ^{aad} :Calanka iyo astaamaha	10
Qodobka 8aad:Caasimadda Dawladda	10
Qodobka 9 ^{aad} :Afka	10
CUTUBKA 2^{AAD}:Xuquuqahayo Xorriyaadka Aasaasiga ah	11
Qodobka 10 ^{aad} : Xaqa nolosha	11
Qodobka 11 ^{aad} :Xuquuqaha Shakhsiga	11
Qodobka12 ^{aad} : Xaqa Eedayanaha	11
Qodobka 13 ^{aad} : Xurmada Hoyga	11
Qodobka 14 ^{aad} : Xorriyadda ka Mid Noqoshada Urur	11
Qodobka 15 ^{aad} : Xorriyadda Kulanka, Bannaanbaxa, Cabashada iyo codsi wadareedka	12
Qodobka 16 ^{aad} :Xuquuqda Haweenka	12
Qodobka 17 ^{aad} :Xuquuqda Carruurta	12
Qodobka 18 ^{aad} : Mamnuucidda Addoonsiga	12
Qodobka 19 ^{aad} :Xorriyadda Diinta iyo Caqiidada	12
Qodobka 20 ^{aad} :Xorriyadda Ra'yiga iyo Afkaarta	13
Qodobka 21 ^{aad} :Saxaafadda	13
Qodobka 22 ^{aad} :Xaqa Matalaadda	13
Qodobka 23 ^{aad} : Xaqa Lahaanshaha Hantida	13
Qodobka 24 ^{aad} :Wajjibaadka Muwaadinka Reer Jubbaland	13
Qodobka 25 ^{aad} :Xuquuqda Doorashada	14
CUTUBKA 3^{AAD}: Nidaamka Xukuumadda Dawlad Goboleedka Jubbaland 15	
Qodobka 26 ^{aad} :Xukuumadda Dawlad Goboleedka	15
Qodobka 27 ^{aad} :LaamahaXukuumadda	15
GOLAHA BAARLAMAANKA	15
Qodobka 28 ^{aad} :Qaab dhismeedka iyo Muddada Barlamaanka Dawlad Goboleedka	15
Qodobka 29 ^{aad} :Shuruudaha XubinnimadaBaarlamaanka Dawlad Goboleedka Jubbaland.	15
Qodobka 30 ^{aad} :Sababaha Lagu LuminKaro Xubinnimada BarlamaankaDawlad Goboleedka	16
Qodobka 31 ^{aad} :Awoodaha iyo Masuuliyaadka Baarlamaanka Dawlad Goboleedka Jubbalan	16
Qodobka 32 ^{aad} :Xasaanadda Xildhibaannada Baarlamaanka	17
Qodobka 33aad: Kalfadhiyada Baarlamaanka	17
Qodobka 34 ^{aad} :Kala Diridda Baarlamaanka Dawlad Goboleedka Jubbaland	18
Qodobka 35 ^{aad} :Kalsooni-kala noqoshada wasiirrada	18
Qodobka 36 ^{aad} :Xeer Hoosaadka Baarlamaanka Dawlad Goboleedka Jubbaland	18
Qodobka 37 ^{aad} :Qaabka Xeer Dejinta	19
Qodobka 38 ^{aad} :Qaabka Muwaadin u soo Gudbiyo Sharci Qabyo Qoraal ah:	19
Qodobka 39 ^{aad} :Doodaha Hindise Sharciyeedyada Baarlamaanka	19
Qodobka 40 ^{aad} :Ogolaanshaha iyo Faafinta Rasmiga ah	20

Qodobka 41 ^{aad} : Diidmada Qayaxan ee Madaxweynaha	20
Qodobka 42 ^{aad} : Jebinta Diidmada Qayaxanee Madaxweynaha	20
Qodobka 43 ^{aad} : Durid Sharci	20

GOLAHA FULINTA **21**

Qodobka 44 ^{aad} : Fulinta	21
Qodobka 45 ^{aad} : Qaab Dhismeedka iyo Shuruudaha Golaha Fulinta	21
Qodobka 46 ^{aad} : Magacaabista Golaha Wasiirada	21
Qodobka 47 ^{aad} : Qaab Dhismeedka iyo Waajibaadka Golaha Fulinta ee Jubbaland	22
Qodobka 48 ^{aad} : Awoodaha iyo Masuuliyadka Golaha Wasiirada	22

GARSOORKA **23**

Qodobka 49 ^{aad} : Qaab dhismeedka Garsoorka Jubbaland	23
Qodobka 50 ^{aad} : Awoodaha iyo xilalka Garsoorka	23
Qodobka 51 ^{aad} : Awoodaha iyo Masuuliyadka Maxkamadda Sare	23
Qodobka 52 ^{aad} : Shuruudaha Garsooraha Maxkamadda Sare	24
Qodobka 53 ^{aad} : Maxkamadda Racfaanka ee Gobollada	24
Qodobka 54 ^{aad} : Maxkamadaha Derejada kowaad (Degmada & Gobolka)	24
Qodobka 55 ^{aad} : Maxkamadda Dastuurka Jubbaland	25
Qodobka 56 ^{aad} : Awoodaha iyo Masuuliyadka Maxkamadda Dastuurka	25
Qodobka 57 ^{aad} : Hab-raaca Go'aannada Maxkamadda Dastuurka	25
Qodobka 58 ^{aad} : Shuruudaha Garsooreyaasha Maxkamadda Dastuurka	26
Qodobka 59 ^{aad} : Sababaha Lagu Waayi Karo Xubinnimada Maxkamadda Dastuurka	26
Qodobka 60 ^{aad} : Guddiga Adeegga Garsoorka	26
Qodobka 61 ^{aad} : Awoodaha iyo Waajibaadka Guddiga Adeegga Garsoorka	26
Qodobka 62 ^{aad} : Xafiiska Xeer Ilaaliyaha Guud ee Jubbaland	27
Qodobka 63 ^{aad} : Shuruudaha iyo Magacaabidda Xeer Ilaaliyaha Guud iyo KuXigeenkiisa	27
Qodobka 64 ^{aad} : Awoodaha iyo Waajibaadka Xafiiska Xeer Ilaaliyaha Guud	27
Qodobka 65 ^{aad} : Awoodaha iyo Masuuliyadka Kuxigeenka Xeer Ilaaliyaha Guud	28
Qodobka 66 ^{aad} : Xil Ka Qaadista Xeer Ilaaliyaha Guud iyo Ku Xigeenkiisa	28

CUTUBKA 4^{aad}: Doorashooyinka Dawlad Goboleedka Jubbaland **29**

Qodobka 67 ^{aad} : Doorashooyinka Guud	29
Qodobka 69 ^{aad} : Shuruudaha Musharaxa Madaxweynenimada	29
Qodobka 70 ^{aad} : Muddada Xil Haynta:	29
Qodobka 71 ^{aad} : Qaabka Doorashada Madaxweynaha Dawlad Goboleedka Jubbaland Muddada ku meel gaarka ah	30
Qodobka 72 ^{aad} : Awoodaha iyo Masuuliyadka Madaxweynaha Jubbaland	30
Qodobka 73 ^{aad} : Awoodaha iyo Masuuliyadka Madaxweyne Ku Xigeenka Jubbaland	31
Qodobka 74 ^{aad} : Xil Ka Qaadista Madaxweynaha iyo Madaxweyne Ku Xigeenka	32
Qodobka 75 ^{aad} : Is Casilidda Madaxweynaha	32
Qodobka 76 ^{aad} : Qaabka Dhaarinta Madaxweynaha Jubbaland	32
Qodobka 77 ^{aad} : Doorashada Afhayeenka iyo Ku Xigeenadiisa	33

CUTUBKA 5^{aad}: Guddiyada Madaxa Bannaan **34**

Qodobka 78 ^{aad} : Mabaadi' da Guud	34
Qodobka 79 ^{aad} : Aasaaska Guddiyada Madaxa Bannaan	34
Qodobka 80 ^{aad} : Guddiga Madaxa Bannaan ee Xuquuq Insaanka	34
Qodobka 81 ^{aad} : Guddiga Madaxa Bannaan ee la Dagaallanka Musuqmaasuqa	34
Qodobka 82 ^{aad} : Guddiga Xallinta Khilaafaadka Isticmaalka Dhulka iyo Dib u Heshiisiinta	35

Qodobka 83 ^{aad} :Guddiga Madaxa Bannaan ee Ciidamada Amniga	35
Qodobka 84 ^{aad} : Guddiga Madaxa Bannaan ee Nabadda iyo dib u Heshiisiinta	36
Qodobka 85 ^{aad} :Guddiga Madax Bannaan ee Adeegga Shaqaalaha Rayidka ah	36
Qodobka 86 ^{aad} :Soo Magacaabista Guddiyada Madaxa Bannaan	37
Qodobka 87 ^{aad} :Qaab Sharciyeedka Guddiyada Madaxa Bannaan	37
CUTUBKA 6^{aad}: Xafiisyada Madaxa Bannaan	38
Qodobka 88 ^{aad} :Xafiiska Hanti Dhawrka Guud ee Jubbaland	38
Qodobka 89 ^{aad} :Awoodaha iyo Masuuliyaaadka Hanti Dhawrka Guud	38
Qodobka 90 ^{aad} :Bangiga Jubbaland	38
Qodobka 91 ^{aad} :Ciidamada Amniga ee Jubbaland	39
CUTUBKA 7^{aad}: XIRIIRKA DAWLADDA DHEXE EE FEDERAALKA AH	40
Qodobka 92 ^{aad} :Xiriirka Dawlad Goboleedka Jubbaland iyo Jamhuuriyadda Federaalka ee Soomaaliya.	40
Qodobka 93 ^{aad} :Guddiga Madaxa Bannaan ee Xuduudaha iyo Doorashooyinka Jubbaland	40
CUTUBKA 8^{aad}: Qodobbada Kama Danbaysta Ah	42
Qodobka 94 ^{aad} : Guddiga Arrimaha Sharciga, Dib u Eegista iyo Dhaqangelinta Dastuurka	42
Qodobka95 ^{aad} :Wax ka Beddelka Dastuurkan	42
Qodobka 96 ^{aad} :Dhaqangelinta Dastuurka	42
Qodobka 97 ^{aad} : Axdiga Ku Meel Gaarka ah ee Jubbaland	43
LIFAAQYADA	44
JEDWALKA KOOWAAD: KHARIIRADA DAWLAD GOBALEEDKA JUBBALAND	44
JEDWALKA LABAAD: CALANKA DAWLAD GOBALEEDKA JUBBALAND	45
JEDWALKA SEDEXAAD: ASTAANTA DAWLAD GOBALEEDKA JUBBALAND	46

CUTUBKA 1^{AAD}: Dawlad Goboleedka Jubbaland ee Soomaaliya

Qodobka 1^{aad}: Aasaaska Dawlad Goboleedka Jubbaland ee Soomaaliya

1. Dawlad Goboleedka Jubbaland waxa lagu aasaasay, saldhigna looga dhigay rabitaanka shacabka deggen gobolada Jubbada Dhexe, Jubbada Hoose iyo Gedo.
2. Magaca dowladdu waa Dawlad Goboleedka Jubbaland ee Soomaaliya.
3. Dawlad Goboleedka Jubbaland ee Soomaaliya waa dimuqraadi, kuna dhisan matalaadda shacabka oo loo dhanyahay, kuna salaysan nidaamka axsaabta badan iyo caddaalad bulsho.
4. Ilaahey Subxaanahu Watacaalaa ka sokow, awoodda oo dhan waxaa iska leh shacabka, waxayna u isticmalayaan si toos ah ayagoo u adeegsanaya hey'adaha u xilsaaran si waa-faqsan dastuurka iyo shuruucda Jubbaland.
5. Midnimada Dawlad Goboleedka Jubbaland waa lama taabtaan.

Qodobka 2^{aad}: Sarraynta Sharciga

1. Ka dib Shareecada Islaamka iyo Dastuurka Jamhuuriyadda Federaalka ee Soomaaliya, Dastuurka ku meel gaarka ee Dawladda Goboleedka Jubbaland ayaa ah sharciga ugu sarreeya ee Jubbaland. Wuxuu hagama xukuumadda Dawlad Goboleedka Jubbaland, siyaasadaha iyo go'aanadadhammaan waaxaha xukuumadda.
2. Sharci kasta, ama go'aan maamuleed oo ka soo horjeeda dasuurka ku meel gaarka ah ee Jubbaland waa waxba kama jiraan.

Qodabka 3^{aad}: Mabaadi'da aasaasiga ah

1. Dawlad Goboleedka Jubbaland ee Soomaaliya waa xubin ka mid ah Jamhuuriyadda Federaalka ah ee Soomaaliya, waxayna u hoggaansamaysaa Dastuurka Ku Meel Gaarka ah ee Jamhuuriyadda Federaalka ee Soomaaliya.
2. Dhammaan dadka reer Jubbaland way u simanyihiin sharciga hortiisa, waxayna leeyihiinxuquuq, sharafiyo caddaalad bulsho.
3. Dastuurka Jubbaland wuxuu ku salaysanyahay mabaadi'da Quraanka Kariimka ah iyo Sunnada Nabigeenna Muxammed (naxariis iyo nabad-gelyo korkiisa ha ahaatee). Wuxuu dastuurkani ilaalinayaa maqaasidda (ujeedooyinka) Shareecada Islaamka iyo cadaaladda bulshada.
4. Dawlad Goboleedka Jubbaland waxaa lagu sameeyay mabaadi'da aasaasiga ah ee awood qaybsiga nidaamka Federaaliga ah.
5. Dastuurka Jubbaland wuxuu sugayaa xuquuqul insaanka, isku-xukunka sharciga, shuruucda caalamiga ah iyo nidaamka kala qaybinta awoodaha sida: sharci dejinta, fulinta iyo garsoorka ee dawladda, si loo hubiyo la xisaabtanka, maamul wanaagga iyo ka turjumiddamasaalixda guud ee shacabka.
6. Haweenka waa in laga qayb geliyaa si dhab ah, dhammaan hay'adaha Dawlad Goboleedka, gaar ahaan xilalka lasoo doorto ama lasoo magacaabo ee saddexda laamood ee dow-

ladda, Guddiyada Madaxa Bannaan iyo hay'adaha kale.

Qodobka 4^{aad}: Diinta

1. Islaamku waa diintakeli ah ee rasmiga ah ee Dawlad Goboleedka Jubbaland.
2. Waxa reebban sharci kasta oo ka horimanaya mabaadi'da guud iyo ujeeddooyinka Sha-reecada Islaamka.

Qodobka 5^{aad}: Dadka

1. Dadka reer Jubbaland waa shacabka Soomaaliyeed ee deggan gobolada Jubbada Dhexe, Jubbada Hoose iyo Gedo.
2. Muwaadin kasta oo Soomaaliyeed oo degganaa Jubbaland ugu yaraan 6 bilood oo isku xiga waxaa loo aqoonsanaya inuu yahay reer Jubbaland.

Qodobka 6^{aad}: Dhulka iyo xuduudaha

1. Dhulka Jubbaland wuxuu ka koobanyahay gobolada Jubbada Dhexe, Jubbada Hoose iyo Gedo (sida kuxusan Jedwalka 1aad).
2. Xuduudaha Jubbaland waa xuduudihii ka jiray Soomaaliya ka hor 1991dii.
3. Jubbaland waxay xagga woqooyi xad kala leedahay Dowlad Gobaleedka Koonfur Galbeed ee Soomaaliya, xagga barina badweynta Hindiya, xagga galbeedna Itoobiya, dhinaca koonfur-reeдна Kenya. Xuduudaha Jubbaland waa lamataabtaan

Qodobka 7^{aad}: Calanka iyo astaamaha

1. Calanka Jubbaland waxa lagu sifeeyey Jedwalka 2aad.
2. Astaanta rasmiga ah ee Jubbaland waxa lagu tilmaamay Jedwalka 3aad.

Qodobka 8aad: Caasimadda Dawladda

1. Bu'aale waa magaalo madaxda Dawlad Goboleedka Jubbaland.
2. Maqaamka caasimadda waxaa lagu qeexidoonaa sharci gaar ah oo la ansixin doono.

Qodobka 9^{aad}: Afka

1. Afka 1aad ee rasmiga ah waa Af-Soomaali
2. Afka 2aad waa Af-Carabi
3. Afka 3aad waa Af-Ingiriisi

CUTUBKA 2^{AAD}: Xuquuqahaiyo Xorriyaadka Aasaasiga ah

Qodobka 10^{aad}: Xaqa nolosha

1. Qof kasta oo reer Jubbaland ah iyo waxa uu xaq u leeyahay:
2. Qof kasta wuxuu xaq u leeyahay nolol.
3. Qof kasta wuxuu xaq u leeyahay in la ilaaliyo naftiisa iyo sharaftiisa

Qodobka 11^{aad}: Xuquuqaha Shakhsiga

1. Dadka oo dhammi way simanyihiin sharciga hortiisa
2. Qofna looma diidi karo xaquuqdiisa iyadoo loo eegayo midab, diin, jinsi, isir, muuqaal, hanti, fikir, aragti siyaasadeed, luqad iyo asal ahaan.
3. Dadka laga tirada badanyahay waxay leeyihiin xuquuqdooda dastuuriga ah iyo midda adaminimo.

Qodobka 12^{aad}: Xaqa Eedayanaha

1. Eedayсанuhu
2. waaka beri dembi illaa ay maxakamadi ka xukunto.
3. Eedayanaha marka la soo xiro waa in maxkamad lagu horkeenaa muddo 48 saacadood gudahood ah
4. Eedayanaha waxa lagu siideyn karaa dammaanad inta dacwaddiisu socoto
5. Eedayсанuhu wuxuu xaq u leeyahay in uu helo qareen difaaca. Diidmada xaqani waxay burinaysa kiiska loo haysto eedayanaha

Qodobka 13^{aad}: Xurmada Hoyga

1. Waxaa reebban baaridda iyo gelidda hoyga qofka amar garsoore la'aantiis.
2. Waxaa waajib ah in amarka garsooraha loo akhriyo deggenaha hoyga.

Qodobka 14^{aad}: Xorriyadda ka Mid Noqoshada Urur

1. Qof kasta wuxuu xaq u leeyahay:
 - I. inuu ka mid noqdo urur ama kooxda uu doono.
 - II. Qof kasta waxa uu xaq u leeyahay in uu aasaaso ama ka mid noqdo urur sida ururrada shaqaalaha, xisbiyada siyaasadda iyo ururrada la midka ah.
 - III. Qof kasta waxa uu xaq u leeyahay in aanu ka mid noqon urur ama hay'ad midna, lagu mana qasbi karo inuu ka mid noqdo koox ama urur.

Qodobka 15^{aad}: Xorriyadda Kulanka, Bannaanbaxa, Cabashada iyo codsi wadareedka

1. Qof kasta waxa uu xaq u leeyahay:
 - I. In uu abaabulo, ka qayb qaato bannaanbaxyo ku salaysan hab nabadgelyo si sharciga waafaqsan.
 - II. In uu cabasho qoraal ah oo shakhsi ama mid wadareed u gudbiyo laamaha xukuumadda Dowlad Goboleedka Jubbaland.

Qodobka 16^{aad}: Xuquuqda Haweenka

1. Waa in sharci ahaan loo dhawro xuquuqda aadaminimo, dhaqaale, siyaasadeed iyo xoriyaadka haweenka sida ayfarayso Shareecadu.
2. Waxaa reebban in la soo rido ilmaha uurka hooyada ku jira haddii aanay jirin xaalad hooyada nolosheeda khatar-gelineysa uuna caddeeyay dhakhtar aqoon u lehi.
3. Waxa reebban gudniinka gabdhaha, waana dembi xeer ciqaabeed ah. Taas oo loo aqoonsanayo in uu yahay jir dil.

Qodobka 17^{aad}: Xuquuqda Carruurta

1. Ereyga carruur ee qodabkan ku xusan waxa loola jeedaa qofka da'diisu ka yartahay 18 sano.
2. Carruurta waxay xaq u leeyihiin nolol, magac, jinsiyad, daryeel caafimaad, waxbarasho iyo barbaarin.
3. Carruurta looma diri karo in ay qabtaan hawl ama adeegyo aan ku habbooneyn da'dooda, ama halis gelin-kara caafimaad kooda iyo koritaan kooda.

Qodobka 18^{aad}: Mamnuucidda Addoonsiga

Qofna lama addoonsan karo, lama dulmin karo, lama tahriibin karo, si khasab ahna looguma shaqaysan karo.

Qodobka 19^{aad}: Xorriyadda Diinta iyo Caqiidada

1. Qof kasta waa u xor inuu diintiisa ku dhaqmo.
2. Diin aan ahayn Islaamka laguma faafin karo Jubbaland

Qodobka 20^{aad}: Xorriyadda Ra'yiga iyo Afkaarta

1. Qof kasta wuxuu xaq u leeyahay:
 - I. Inuu yeesho, soona bandhigo ra'yigiisa, macluumaadkiisa iyo afkaartiisa.
 - II. Qofku wuxuu fikraddiisa ku cabbiri karaa qaab saxaafadeed oo hadal ah, qoraal, muuqaal, suugaan iyo habab kale oo sharciga iyo anshaxa waafaqsan, waxaana reebban faaf reebka.
 - III. Qof walba wuxuu xaq u leeyahay in uu muujiyo hal-abuurkiisa faneed, xorriyadiisa aqooneed iyo middiisa cilmi baariseedba.

Qodobka 21^{aad}: Saxaafadda

1. Saxaafaddu waa in ay heshaa xorriyad buuxda.
2. Xeer gaar ah ayaa qeexi doona xorriyadda saxaafadda.

Qodobka 22^{aad}: Xaqa Matalaadda

1. Sida Dastuurkani qabo:
 - I. Qof kasta waxa uu xaq u leeyahay in uu yeesho wakiil siyaasadeed oo matala.
 - II. qof kasta waxa uu xaq u leeyahay in uu ka qayb galo arrimaha maamulka ee Jubbaland.
 - III. Barlamaanka Jubbaland ayaa samayn doona sharciga doorashooyinka, si waafaqsan Dastuurka Ku Meel Gaarka ah ee Jubbaland iyo kan Jamhuuriyadda Federaalka ah ee Soomaaliya.

Qodobka 23^{aad}: Xaqa Lahaanshaha Hantida

1. Qof kasta wuxuu xaq u leeyahay inuu yeesho hanti, kuna dhaqmo, ku naalloodo, iska gado ama iska wareejiyo markuu doono.
2. Xaqa lahaanshaha hantidu waa lama taabtaan. Barlamaanka Dawlad Goboleedka Jubbaland ayaa samayn doona sharci qeexaya qaabka loo yeelan karo hanti.
3. Xukuumaddu waxay si sharci ah hanti ula wareegi kartaa marka ay jirto dan guud oo si daah furan loo soo bandhigay. Qof kasta oo hantidiisa dan guud awgeed loogala wareegaa wuxuu xukuumadda xaq ugu leeyahay magdhaw caadil ah.

Qodobka 24^{aad}: Waajibaadka Muwaadinka Reer Jubbaland

Qof kasta waxa waajib ku ah:

1. Ilaalinta dastuurka iyo shuruucda kale ee dalka.
2. Dhawrista sharciga, una hoggaansamo awaamirta sharciga ah.
3. Ilaalinta nabadda iyo xasilloonida Jubbaland.
4. Ilaalinta deegaanka
5. Bixinta cashuuraha.
6. Isdiwaan geliyo, codkiisana dhiibto xilliyada doorashooyinka

Qodobka 25^{aad}: Xuquuqda Doorashada

1. Qof kasta oo reer Jubbaland ah, oo jira 18 ama ka weyn wuxuu xaq u leeyahay in uu wax doorto, lana doorto.
2. Waxa ka reebban xubnaha ciidamada qalabka sida iyo garsoorayaashu in ay ka mid noqdaan xisbi siyaasadeed, loomana ogola in ay isu sharaxaan mansab la soo doorto.
3. Masuuliyinta sare ee laamaha xukuumadda looma ogola in ay isu soo sharaxaan xil la soo doorto, haddii aanay marka hore iska casilin mansabkay hayaan.
4. Xaq codeynta ee qofka waa la laalayaa inta uu xabsiga ku jiro haddii ay mudada lagu xukumay ka badan tahay lix bilood.
5. Murasharax u tartamaya xil la soo doorto Jubbaland, waa in aan lagu xukumin shan sano iyo ka badan oo xarig ah shantii (5) sano ee la soo dhaafay maalinta cod bixinta lagu dhawaaqo ka hor.

CUTUBKA 3^{AAD}: Nidaamka Xukuumadda Dawlad Goboleedka Jubbaland

Qodobka 26^{aad}:Xukuumadda Dawlad Goboleedka

1. Dawlad Goboleedka Jubbaland ee Soomaaliya waa nidaam madaxtooyo.
2. Barlamaanka Dawlad Goboleedka Jubbaland waxa lagu soo dooranayaa nidaamka siyaasadeed ee axsaabta badan, doorashaduna waa hal cod halkii qofba.
3. Dhammaan axsaabta diiwaan gashan ee soo buuxisa shuruudaha shuruucda axsaabta siyaasadeed way ka qayb geli karaan, wayna u ololeyn karaan doorashooyinka.
4. Sharci gaar ah ayaa lagu maamulayaa nidaamka doorashooyinka.

Qodobka 27^{aad}:LaamahaXukuumadda

Saddexda laamood ee Xukuumadda Dawlad Goboleedka Jubbaland waa:

1. Golaha Barlamaanka
2. Fulinta
3. Garsoorka

GOLAHA BAARLAMAANKA

Qodobka 28^{aad}:Qaab dhismeedka iyo Muddada Barlamaanka Dawlad Goboleedka

1. Barlamaanku waa Golaha Shacabka ee Dawlad Goboleedka Jubbaland,wuxuuna ka kooban yahay 85 xildhibaan. Doorashooyinka barlamaanka ka dib marka la ansixiyo dastuurkan, ugu yaraan 15% xildhibannadu waa in ay noqdaan haween. Muddada barlaamanku waa afar (4) sano oo ka billaabaneysa maalinta la dhaariyo.
2. Kalfadhiyada Barlamaanku waa inaysi rasmi ah u furmaan muddo 30 beri gudahood ah, oo ka billaabaneysa maalinta natiijada doorashooyinka si rasmi ah loo shaaciyo.

Qodobka 29^{aad}:Shuruudaha XubinnimadaBaarlamaanka Dawlad Goboleedka Jubbaland.

1. Qof kasta oo reer Jubbaland ahi waxa uu isu sharixi karaa doorashooyinka barlamaanka Dawlad Goboleedka haddii:
 - I. Ay da'diisu kaweyn tahay 25 sano.
 - II. U diiwaan gashanyahay codbixiye ahaan.
 - III. Aanay maxkamadi ku xukumin shan (5)sano iyo ka badan oo xarig ah,san (5) sano gudahood inta aan lagu dhawaaqin doorashada baarlamaanka.
2. Guddiga Doorashooyinka iyo Xuduudaha ee Jubbaland waa in ay hubiyaan in musharraxintu dhammaan soo buuxiyeen shuruudaha sharciga ah ee looga baahan yahay musharrax kasta.

Qodobka 30^{aad}: Sababaha Lagu LuminKaro Xubinnimada Baarlamaanka Dawlad Goboleedka:

- I. In uu xildhibaan ku geeriyoodo.
- II. In uu warqadda is-casilaadda u gudbiyo Afhayeenka Baarlamaanka
- III. In lagu helo fal dambiyeed xeer ciqaabeed ah oo maxkamadi xukuntay, muddada xabsi-guna ka badan tahay san (5) sano.
- IV. In uu ka maqnaado labo (2) kalfadhi oo caadi ah iskuna xiga sabab la'aan.
- V. Bedelaadda kursi bannaan oo Baarlamaanka ah qaabka loo buuxinayo waxa lagu maamulayaa sharciga doorashooyinka.
- VI. Xubin xildhibaan ah haddii uu aqbalo qabashada xilkale oo dawladeed ama loo magacaabo Golaha Wasiirada, wuxuu luminayaa xubinnimadiisa Baarlamaanka.
- VII. Dhaarinta xildhibaan cusub waa in lagu sameeyaa 30 beri gudahood, ka dib marka la shaaciyo natijada doorashada.

Qodobka 31^{aad}: Awoodaha iyo Masuuliyadka Baarlamaanka Dawlad Goboleedka Jubbaland

1. Baarlamaanka Dawlad Goboleedka Jubbaland wuxuu leeyahay awoodahan iyo masuuliyadkan:
 - I. Dib u eegidda, ansixinta, wax ka beddelka, diidmada, iyo tirtiridda sharci qabyo ah iyo mid jirayba ee Dawlad Goboleedka Jubbaland.
 - II. Ku ansixinta aqlabiyadda codbixineed ee (1/2+1) deyn lacageed oo ay dowladda Jubbaland heshiis kula gasho hay'ad shisheeye oo ah kuwa daynta bixiya.
 - III. Ku ansixinta aqlabiyadda codbixineed ee (1/2+1) heshiisyada iskaashiga caalamiga ah ee Jubbaland ay qayb ka tahay.
 - IV. Doorashada Madaxweynaha Jubbaland, codbixintuna tahay qarsoodi xilliga koowaad.
2. Ansixinta ama diidmada:
 - a. Degmooyin ama gobollo cusub oo ay soo jeediso samayntooda xukuumadda Jubbaland
 - b. Xubnaha Guddiyada madaxabannaan iyo garsooreyaasha.
 - c. Barnaamijyada xukuumadda.
 - d. Miisaaniyad sannadeedka ay xukuumaddu soo bandhigto iyo wax kabadelka miisaaniyaddaas.
 - e. Xisaab xirka miisaaniyad sannadeedkii hore.
 - f. Ku ansixinta ama diidmada aqlabiyadda codbixineed ee (50%+1) Golaha Wasiirada.
 - g. Xasaanad kala noqoshada mas'uuliyiinta la soo doorto ama baarlamaanku ansixiyaan. Haddi masuul xaq u leh xasaanad lagu qabto asagoo dembi faraha kula jira, baarlamaanka waa in la soo ogeysiyyaa, lagana codsadaa in ay fasaxaan dacwadku oogidda masuulkaas.
 - h. Ansixinta iyo diidmada hindiseyaasha ay xukuumaddu ku aasaasayso ama ku kala dirayso hay'adaha dawliga ah
3. Baarlamaanka Jubbaland waxa uu leeyahay Awoodahan Kormeer:
 - I. Baarlamaanku wuxuu kormeeraa, ka doodaa, xukuumaddana dusha ka saaraa mas'uuliyadka dhaqan gelinta siyaasadaha xukuumadda
 - II. Baarlamaanku wuxuu u yeeri karaa mas'uuliyiinta sare ee xukuumadda si ay ugala

xisaabtamaan siyaasadaha xukumadda, kharashaadka iyo go'aanada maamulka ee xukuumadda.

- III. In ay u yeeraan madaxweynaha Dawlad Goboleedka Jubbaland si uu uga jawaabo su'aalaha ay qabaan barlamaanku hal mar kalfadhigiiba.
4. In ay kormeeraan, qiimeeyaanna dhaqan gelinta shuruucda Dawlad Goboleedka Jubbaland
 - I. In ay u yeeraan masuulyiinta sare ee xukuumadda si ay u kormeeraan.
 - II. Haddii masuul baarlamaanku u yeeray soo xaadiri waayo cudurdaar la'aan, baarlamaanku waa in uu ogeysiiyaa madaxweynaha, kana talo bixiyaan sidii tallaabo looga qaadi lahaa.
 - III. Baarlamaanku wuxuu u soo gudbiyaa Golaha Wasiirrada talo bixin ku saabsan miisaaniyadda iyo habaynta arrimaha maaliyadda ka dib markay warbixin ka helaan Hanti-Dhawrka Guud ee Jubbaland.
5. Baarlamaanka Jubbaland waxa uu leeyahay awoohan matalaadeed:
 - I. Wuxuu matalaa danaha shacabka Jubbaland.
 - II. Wuxuu matalaa masaalixda deegaannada soo doortay xildhibaan kasta oo xubin ka ah golaha Baarlamaanka Jubbaland.

Qodobka 32^{aad}: Xasaanadda Xildhibaanada Baarlamaanka

- I. Xildhibaanada Baarlamaanku waxay leeyihiin xasaanad marka ay joogaan xarunta-Baarlamaanka, iyo marka ay ku jiraan hawlo barlamaan.
- II. Xildhibaan laguma dacweyn karo marka fikirkiisa uu ka dhiibto doodaha kalfadhiyada ama kulamada guddiyada Baarlamaanka.
- III. Haddii aysan ogolaan baarlamaanku, xubin ka mid ah golaha lagumasoo oogi karo dacwad xeer ciqaabeed muddadau hayo xilka xildhibaanmada, lama xiri karo, lamana baari karo isaga iyo hoygiisaba, haddii aan lagu qaban isagoo dembi faraha kula jira. Haddii aanu baarlamaanku ansixin, xildhibaan lama xiri karo xataa haddii maxkamadi amarto.
- IV. Sharci gaar ah ayaa qeexaya xasaanadda xildhibaanada xubnaha ka ah Baarlamaanka Dawlad Goboleedka Jubbaland.

Qodobka 33aad: Kalfadhiyada Baarlamaanka

1. Baarlamaanka lasoo doortay waa inuu u fadhistaa kalfadhigiisa 1aad muddo 30 beri gudaahood ah, ka dib marka ay Guddiga Doorashooyinku ku dhawaaqdo natiijada rasmiga ah.
2. Baarlamaanku waa inuu yeeshaa labo (2) kalfadhi oo caadi ah sannadkii. kalfadhi kasta waa inuu socdaa ugu yaraan afar (4) bilood.
3. Xeer hoosaadka Baarlamaanka ayaa go'aaminaya waqtiga, taariikhda iyo muddada fasaxa ee kalfadhiyada inta aan la furin kalfadhiga caadiga ah ee baarlamaanka.
4. Baarlamaanku wuxuu yeelan karaa kalfadhi aan caadi ahayn marka:
 - I. Madaxweynaha Jubbaland uu codsado ka dib markuu talo ka helo Golaha Wasiirrada.
 - II. Afhayeenka baarlamaanku uu isugu yeero.
 - III. Haddii 20% xildhibaanada ay usoo gudbiyaan codsi qoraal ah oo sababaysan afhayeenka.

Qodobka 34^{aad}:Kala Diridda Baarlamaanka Dawlad Goboleedka Jubbaland

1. Baarlamaanka waa in lakala diraa marka ay muddadiisu dhammaato.
2. Baarlamaanka waa lakala diri karaa:
 - I. Haddii aqlabiyadda xildhibaannada xubnaha ka ahi ay iscasilaan.
 - II. Haddii barlamaanku uu ku guul darraysto inuu qabto 2 kalfadhi oo isku xiga sabab la'aan.
3. Madaxweynuhu waa inuu codsi qoraal ah u gudbiyaa Maxkamadda Dastuurka si loo hubiyo haddii hal ama dhammaan shuruudaha kor ku xusan ay dhacaan.
4. Ka dib marka ay soo saarto Maxkamadda Dastuurku xukunkeeda, Madaxweynuhu waa inuu soo saaraa wareegto uu ku kala dirayo Barlamaanka Jubbaland.
5. Wareegtada waa in lagu amraa in lagu qabanayo doorashada muddo (45) beri ah gudahood.

Qodobka 35^{aad}:Kalsooni-kala noqoshada wasiirrada

1. Baarlamaanku waxay go'aamin karaan codka kalsooni-kala noqoshada ee Golaha Wasiirrada wadar ahaan, laakiinse aan ahayn keli, keli..
2. Ugu yaraan 20 xildhibaan oo ka mid ah xubnaha Baarlamaanka ayaa soo gudbin kara mooshinka codka kalsooni kala noqoshada Golaha Wasiirrada.
3. Ugu yaraan seddex meelood, hal meel (1/3) tirada guud ee xildhibaanadu waa in ay ogo-laadaan in laga doodo mooshinka kalsooni kala noqoshada si doodiisa loo furo.
4. Tirada guud ee xildhibaanada 2/3 (saddex meelood labo meel)waa inay u codeeyaan si kalsoonida loogala noqdo Golaha Wasiirrada.
5. Haddii codka kasooni kala noqoshada la meel mariyo, madaxweynuhu waa inuu soo dhisaa Gole Wasiirro oo cusub. Golihii hore waa inuu shaqadiisa usii wado si caadi ah illaa laga soo dhisayo xukuumad cusub, Barlamaankuna ansixiyo.
6. Madaxweynuhu hal (1) mar oo keliya ayuu soo bandhigi karaa liiska xubnaha Golaha Wasiirrada ee mooshinka kalsooni kala noqoshada lagu qaaday.
7. Haddii codka kalsooni kala noqoshada lagu qaado Golaha Wasiirrada, madaxweynuhu waa inuu ku soo magacaabaa xukuumad cusub 21 beri gudahood oo ka billaabaneysa maalinta la meel mariyey codka kalsooni kala noqoshada.

Qodobka 36^{aad}:Xeer Hoosaadka Baarlamaanka Dawlad Goboleedka Jubbaland

1. Baarlamaanku waa inuu samaystaa xeer hoosaad u saamaxaya in dhammaan xildhibaanadu ay si habsami leh uga qayb qaataan arrimaha Golaha.
2. Baarlamaanku waa inuu sameeyaa guddi hoosaadyo fuliya waajibaadka Golaha.
3. Marka hindise sharciyeed loo soo gudbiyo Baarlamaanka, waa in guddiga u xilsaaran loo gudbiyaa si ay ugu kuur-galaan, ka dibna warbixin iyo talo bixin ay ugu soo gudbiyaan kulamada Baarlamaanka.
4. Hindise sharciyeed uu baarlamaanku diiday laguma soo celin karo golaha afar (4)bilood gudahood, laga billaabo maalintii la diiday sharciga qabyo qoraalka ah.

5. Doodaha Baarlamaanka iyo guddiyadiisuba waa in fadhiyadoodu ahaadaan kuwa u furan dadweynaha haddii uu saamaxayo amnigu
6. Xeer hoosaadka Baarlamaanka ayaa tilmaami doona goorta iyo sida warbaahinta loogu ogolaanayo Golaha Barlamaanka.
7. Doodaha kalfadhigada waa in sidooda loo qoraa ama si eleكتروonik ah loo duubaa, laguna kaydiyaa aarkiifiyada rasmiga ah ee barlamaanka.

Qodobka 37^{aad}:Qaabka Xeer Dejinta

1. Sharci qabyo qoraal ah waxaa u soo jeedin kara baarlamaanka:
 - I. Ugu yaraan 10 xildhibaan oo xubin ka ah Baarlamaanka Jubbaland
 - II. Golaha Wasiirrada
 - III. Koox reer Jubbaland ah oo dhan ugu yaraan 5,000 oo qof, una diiwaangashan codbixiyeyaal.

Qodobka 38^{aad}:Qaabka Muwaadin u soo Gudbiyo Sharci Qabyo Qoraal ah:

1. Haddii koox reer Jubbaland ahi ay soo jeedinayaan sharci qabyo qoraal ah, waa in lagusoo lifaaqo waraaqaha caddaynaya magaca,da'da,saxiixa shakhsiyaadka iyo caddaynta Jubbalandnimada.
2. Dadka lagu xusay qodobka 38(1) waa in ay ku soo lifaaqaan sharciga qabyo qoraalka ah magacyada ugu yaraan 2 qof oo lala xirriro karo.
3. Shakhsiyaadka ku xusan qodobka 38(1) looma ogola in ay soo gudbiyaan sharci qabyo qoraal ah oo la xiriira nidaamka canshuurahata ama dakhliga soo galaya qasnadda dowladda,miisaaniyadda iyo arrimaha maaliyadda, difaaca ama arrimaha amniga.
4. Barlamaanku waa inuu kagabaaraan degaa codsiga qabyo qoraalka ee loo soo gudbiyay isla kalfadhigaas loo soo gudbiyey ama kalfadhiga xiga,dabadeedna xildhibaanadu u codeeyaan.

Qodobka 39^{aad}:Doodaha Hindise Sharciyeedyada Baarlamaanka

1. Hindise sharciyeed kasta oo la hor keeno Baarlamaanka waa in looga dooda qodob-qodob inta aan cod loo qaadin.
2. Hindise sharciyeedka baarlamaanku ansixiyo waa in uu afhayeenku saxiixaa isagoo 3 nuqul ah,ka dibna loo gudbiyaa Madaxweynaha.
3. Hindise sharciyeedka Baarlamaanku uu diido lagumasoo celin karo mar kale kalfadhiga lagu diiday.
4. Sharciga qabyo qoraalka ah ee miisaaniyadda dawladda waa in Golaha Wasiirrada soo hordhigaan barlamaanka ugu yaraan 30 beri ka hor inta aan loo codayn

Qodobka 40^{aad}:Ogolaanshaha iyo Faafinta Rasmiga ah

1. Madaxweynuhu waa inuu muddo 30 beri ah ku ogolaado ama ku diido sharci baarlamaanku uu ansixiyey.
2. Haddii aanu madaxweynuhu waxba ka qabin:
 - I. sharcigaasi waa ansax, waana in lagu daabacaa faafinta rasmiga ah 30 beri gudahood. Markaa ka dib waa in loo diraa xafiiska Xeer Ilaaliyaha Guud si loogu kaydiyo aarkiifiyada Dowladda.
 - II. Nuqulada sharciga cusub waa in lagu kaydiyaa aarkiifiyada Baarlamaanka,xafiiska Madaxweynaha iyo xafiiska Xeer Ilaaliyaha Guud ee Jubbaland.
3. Marka lagu daabaco faafinta rasmiga ah,sharcigu wuxuu dhaqan galayaa muddo 15 beri ah ka dib.

Qodobka 41^{aad}:Diidmada Qayaxan ee Madaxweynaha

1. Madaxweynuhu wuxuu awood u leeyahay inuu diido sharci baarlamaanku ansixiyey,
2. Diidmada madaxweynaha waa in uu ku soo gudbiyo qoraal uu ugu sheegayo Barlamaanka sababaha uu u diiday inuu saxiixo sharcigaas.

Qodobka 42^{aad}:Jebinta Diidmada Qayaxanee Madaxweynaha

1. Haddii Madaxweynuhu uu sharci qabyo qoraal ah oo Barlamaanku ansixiyay ku isticmaalo diidmada qayaxan waxaa lagu jebin karaa diidmadiisa marka sharciga dib loogusoo celiyo Baarlamaanka, kadibna codka tirada guud ee xildhibaanada 2/3(saddex meelood labo meel)ay ku meelmariyaan sharcigaas.
2. Afhayeenka Baarlamaanka Jubbaland waa in uu dib ugu diraa sharciga Madaxweynaha isagoo ku lifaaqaya fariin in diidmadiisii cod Barlamaan lagu jebiyey.
3. Madaxweynuhu markuu helo qoraalka in diidmadiisii la jebiyey, waa inuu ogolaadaa sharci-ga qabyo qoraalka ah si uu u noqdo qaanuun,una gudbiyaa xafiiska Xeer Ilaaliyaha Guud si uu ugu soo saaro sharciga faafinta rasmiga ah.
4. Wuxuu dhaqan galayaa sharcigaasi cusubi 15 beri ka dib.

Qodobka 43^{aad}:Durid Sharci

1. Sharci maray habraaca ansixinta sharciyada ee baarlamaanka waxaa lagu duri karaa oo keliya in codsi loo gudbiyo Maxkamadda Dastuurka haddii uu sharcigu ka soo horjeedo dastuurka.
2. Sida ku xusan qodobka 43(1) sharci la ansixiyey waxa duri kara:
 - I. Golaha Baarlamaanka 1/3 (saddex meelood hal meel).
 - II. Golaha Wasirada,
 - III. ugu yaraan 5,000 oo qof, oo diiwaangashan codbixiyeyaal

GOLAHA FULINTA

Qodobka 44^{aad}:Fulinta

1. Golaha Fulintu wuxuu ka koobanyahay:
 - I. Madaxweynaha
 - II. Madaxweyne ku xigeenka
 - III. Golaha Wasiirrada
2. Awoodda fulinta ee Dowlad Goboleedka Jubbaland waxaa leh Golaha Fulinta oo ka kooban Madaxweynaha, Madaxweyne ku xigeenka, iyo Golaha Wasiirrada.
3. Golaha Wasiiradu waa hay'adda ugu sarraysa fulinta ee xukuumadda Jubbaland.
4. Madaxweynaha Jubbaland ayaa soo magacaabaya Golaha Wasiirrada. Xubnaha Golaha Wasiirrada waxay ka iman karaan Baarlamaanka iyo shacab weynaha kale. Xildhibaanku haddii uu aqbalu xil wasiirnimo wuxuu islamarkiiba luminayaa xubintii xildhibaannimo.

Qodobka 45^{aad}:Qaab Dhismeedka iyo Shuruudaha Golaha Fulinta

1. Golaha Fulintu waxay ka koobanyihiin Madaxweynaha, Madaxweyne kuxigeenka
2. Golaha Wasiiradu waa in aanay ka badan 15 wasiir.
3. Si loogu magacaabo qof in uu ka mid noqdo Golaha Wasiirrada waxaa laga rabaa inuu buuxiyo shuruudaha hoos ku xusan:
 - I. Inuu yahay muwaadin Soomaaliyeed oo deggen Jubbaland.
 - II. Inuu haysto shahaado jaamacadeed, ama in uu leeyahay 10 sano oo waayo-aragnimo ah.
 - III. In uu leeyahay ugu yaraan 7 sano oo maareyn ama khibrad maamul ah.
 - IV. In ay da'diisu tahay 30 sano iyo ka weyn.
4. Madaxweynaha, Madaxweyne Ku Xigeenka, Golaha Wasiirrada, iyo masuuliyiinta sare ee dawladda looma ogola inay ganacsigooda gaarka ah maamulaan muddada ay xilka xafiiska hayaan.
5. Xubin ka mid ah Golaha Fulinta kama qayb qaadan karto wada hadal, umana codeyn karto arrin golaha hortaalla oo masuulkaas maslaxadi ugu jirto ama u eg.
6. Madaxweynaha, Madaxweyne kuxigeenka iyo xunaha Golaha Wasiiradu waa inay u cad-deeyaan hantidooda Hanti Dhawrka Guud bisha u horreysa ka dib marka xilka loo dhaariyo.
7. Dhammaan go'aannada ay qaataan Golaha Wasiiradu si aqlabiyad ah waa masuuliyad wadareed.

Qodobka 46^{aad}:Magacaabista Golaha Wasiirada

1. Xubnaha Golaha Wasiirrada waa inuu:
 - I. Soo magacaabo Madaxweynaha Jubbaland
 - II. Waa in baarlamaanku cod hal dheeri ah (1/2+1) ku ansixiyo wadar ahaan
 - III. Horgaynta baarlamaanku ee Goluhu waa inayna ka badan 21 beri oo ka billaabaneysa maalinta Madaxweynaha la dhaariyo.

Qodobka 47^{aad}:Qaab Dhismeedka iyo Waajibbaadka Golaha Fulinta ee Jubbaland

1. Dawlad Goboleedka Jubbaland waxay ka koobantahay:
 - a. Golaha Fulinta
 - b. Maamulka gobollada
 - c. Maamulka degmooyinka
2. Xeer gaar ah ayaa qeexaya awoodaha iyo xiriirka xukuumadda iyo maamullada gobollada iyo degmooyinka. Baarlamaanka Dawlad Goboleedka Jubbaland waa inuu sidoo kale sameeyaa sharci gaar ah oo qeexaya awoodaha, masuuliyadka isticmaalka kharashaadka iyo khayraadka dhaqaale ee qaybaha Dawladdu ay leeyihiin.
3. Xukuumadda Jubbaland waa in ay:
 - I. Icticmaashaa awoodda fulinta
 - II. Ku shaqaysaa mabaadi'da dimuqraadiyadda
 - III. Dejisaa ayna fulisaa qorshayaasha horumarineed ee dhaqaalaha, bulshada iyo dhaqanka
 - IV. Waa in ay dejisaa ayna fulisaa siyaasadaha maaliyadeed iyo dhiiri gelinta maalgashiga.
 - V. Waa in ay diyaarisaa miisaaniyad sannadeedka ku tala galka ah ee Jubbaland.
 - VI. Waajibbaadka shaqo ee xukuumadda waxaa lagu soo saarayaa xeer hoosaad qeexaya hawlhooda
4. Maamulka gobollada iyo degmooyinka
 - I. Guddoomiyeyaasha gobollada, degmooyinka waxaa magacaabaya Madaxweynaha ka dib marka uu la tashado wasiirka ay khusayso iyo masuuliyiinta gobolka.
 - II. Shuruudaha xulitaanka waa in lagu saleeyaa aqoon, karti iyo waayo-aragnimada musharaxa.
 - III. Degmo kasta waxay yeelanaysaa gole deegaan oo la soo doorto.
 - IV. Sharciga goleyaasha deegaanka ee Jubbaland oo uu baarlamaanku soo saari doono ayaa dejinaya mabaadi'da guud ee saldhigga u noqonaya hab-maamuleedka degmada, xil gudashada iyo adeegsashada awoodaha degmooyinka.

Qodobka 48^{aad}:Awoodaha iyo Masuuliyadka Golaha Wasiirrada

Golaha wasiirradu waxay leeyihiin masuuliyadkan soo socda:

- I. Wuxuu goluhu soo jeediyaa, isku soo dubbaridaa, fuliyaana isteratiijiyadda siyaasadeed, nabadgelyo, dhaqaale iyo horumarinta bulshada.
- II. Wuxuu soo qeexaa awoodaha gaarka ah ee ay leeyihiin waaxaha hoos yimaadda fulinta
- III. Wuxuu soo jeediyaa canshuuro cusub. Wuxuu wax kabadel ku samayn karaa qaab canshuureedyadii hore iyadoo loo eegayo baahida shacabka.
- IV. Wuxuu ansixiyaa miisaaniyadda sannadka ee xukuumadda, sida qiyaasta dakhliga iyo saadaashakharashaadka xukuumadda sannad maaliyadeedka soo socda. Wuxuu qeexaa doorka shaqaalaha dowladda iyo mushaaraadkooda, una gudbiyaa Baarlamaanka ugu yaraan 3 bilood ka hor inta aanu billaaban miisaaniyad sannadeedku.
- V. Wuxuu goluhu ku dhawaaqaa xaalad degdeg ah, wuxuuna u gudbiyaa Baarlamaanka muddo 30 beri gudahood ah si ay u ansixiyaan.
- VI. Wuxuu usoo jeediyaa Baarlamaanka qaab dhismeedka hay'adaha iyo xafiisyada

madaxa bannaan iyo hay'adaha kale ee dawladda.

VII. Wuxuu u soo bandhigaa Baarlamaanka si uu ansixiyo, xubnaha Maxkamadda Sare, garsooreyaasha Maxkamadda Dastuurka, Xeer Ilaaliyaha Guud, Hanti Dhawrka Guud, iyo Guddoomiyaha Bangiga Jubbaland.

VIII. Wuxuu ka baaraan degaa, go'aamiyaana dhammaan arrimaha uu madaxweynuhu usoo gudbiyo Golaha Wasiirrada.

GARSOORKA

Qodabka 49^{aad}: Qaab dhismeedka Garsoorka Jubbaland

1. Garsoorka Jubbaland wuxuu ka kooban yahay:
 - I. Maxkamadda Dastuurka
 - II. Maxkamadda sare
 - III. Maxkamadda Racfaanka ee Gobollada
 - IV. Maxkamadda Derejeda Kowaad (gobollada & degmooyinka).
 - V. Maxkamadda Militeriga
2. Garsoorku wuu ka madaxbannaan yahay Barlamaanka iyo Golaha Fulinta. Dhammaan garsooreyaashu waa in ay haystaan dammaanad muddada xilka loo magacaabay.

Qodobka 50^{aad}: Awoodaha iyo xilalka Garsoorka

Awoodaha garsoorku waa:

1. Dhageysiga iyo go'aaminta dacwadaha. Xukunnada garsoorku waa in lagu saleeyaa Shaaracada Islaamka, dastuurka Jubbaland, dastuurka Jamhuuriyadda Federaalka ee Soomaaliya, shuruucda caalamiga ah iyo qawaaniinta kale ee u yaalla dalka.
2. Maxkamadda ciidamadu waxay qaadi kartaa oo keliya dacwadaha ciidamada.
3. Garsoorka Jubbaland awood uma laha inuu dhagaysto dacwadaha la xiriira u gudbinta muwaadin danbi ka galay dalka.
4. Sharci gaar ah oo baarlamaanku soo saari doono ayaa nidaamin doona awoodaha iyo masuuliyadka Maxkamadda Sare, Maxkamadda Racfaanka ee Gobolka iyo Maxkamadaha Derajada Koowaad.

Qodobka 51^{aad}: Awoodaha iyo Masuuliyadka Maxkamadda Sare

1. Maxkamadda Sare:
 - I. waa maxkamadda ugu sarreysa Jubbaland.
 - II. Maxkamadda sare waa inay u gudbisaa Guddiga Adeegga Garsoorka xeer qabyo qoraal ah oo la xiriira shuruucda arrimaha maamulka garsoorka. Sharcigaa qabyada ah waxa loo gudbinayaa barlamaanka Jubbaland si uu uga doodo.
 - III. Maxkamadda sare waxay xukun kama danbayn ah ka soo saartaa racfaannada laga qaato maxkamadaha hoose.
 - IV. Maxkamadda sare waxay xukun kama danbayn ah ka soo saartaa racfaannada laga qaato maxkamadaha hoose.

- V. Maxkamadda sare waxay xallisaa khilafaadka arimaha qawaaniinta ee maxkamadaha hooseee aanay awoodda u lahayn.
 - VI. Maxkamadu waxay xukuntaa qaab sharciyeedka la raacay dacwadaha lagu go'aamiyey dalka dibaddiisa ee laga fulinayo gudaha Jubbaland.
 - VII. Maxkamadda sare waxay kormeertaa maxkamadaha hoose iyo qaab maamuleedka garsoorka.
 - VIII. Maxkamadda sare waxay dhagaysataa dacwadaha maamuleed ee masuuliyiinta sare.
2. Awoodaha Maxkamadda Sare waxalagu qeexaya sharci uu saaro barlamaanka Jubbaland.
 3. Tirada garsooreyaasha Maxkamadda Sare waxa lagu go'aamin doonaa sharci gaar ah.

Qodobka 52^{aad}: Shuruudaha Garsooraha Maxkamadda Sare

1. Garsooraha maxkamadda sare waa inuu buuxiyaa shuruudahan:
 - I. Yahay muwaadin Soomaliyeed, Muslim ah, oo reer Jubbaland ah.
 - II. Aysan maxkamadi ku xukumin danbi xeer ciqaabeed oo shan (5) sano iyo ka badan ah.
 - III. Da'diisu ka yarayn 40 sano
 - IV. Haystaa shahaado heer jaamacadeed oo ahshareecada ama qawaaniinta.
 - V. Leeyahay ugu yaraan 5 sano oo khibrad garsoorennimo ah,ama ugu yaraan 6 sano oo khibrad qareenimo ah.
 - VI. Leeyahay daacadnimo.

Qodobka 53^{aad}: Maxkamadda Racfaanka ee Gobollada

1. Maxkamadda Racfaanka ee Gobollada waxaa xarun u ah caasimadaha gobollada Jubbaland.
2. Maxkamaddu waxay dhagaysataa dacwadaha racfaanka lagaga qaadanayo go'aannada maxkamadaha hoose.
3. Maxkamadda racfaanka ee gobolladdu waxay awood u leedahay oo keliya gobolka ay ka hawl gasho.
4. Maxkamadda racfaanka ee gobolka waxay dacwad ku galeysaa ugu yaraan saddex (3) garsoore.
5. Shuruudaha garsooreyaasha maxkamadda racfaanka waxay la mid yihiin shuruudaha u yaalla garsooreyaasha Maxkamadda Sare sida ku xusan sida uu dhigayo dastuurkan.

Qodobka 54^{aad}: Maxkamadaha Derejada kowaad (Degmada & Gobolka)

1. Maxkamadaha derejada kowaad waxa ay dhageysan karaan dacwadaha oo dhan marka laga reebo kuwa la xiriira maamulka iyo dacwadaha dastuurku uu caddeeyey in ay dhageystaan maxkamadda ka sare.
2. Tirada garsooreyaasha maxkamadaha derejada kowaad waxalagu soo go'aamindoona sharci gaar ah.

Qodobka 55^{aad}: Maxkamadda Dastuurka Jubbaland

1. Jubbaland waxay yeelanaysaa Maxkamad Dastuuri ah oo ka kooban 7 garsoore.
2. Garsooreyaasha Maxkamadda Dastuurka ee Jubbaland waxaa soo magacaabaya Golaha Fulinta oo magacyadooda u gudbin Golaha Baarlamaanka Jubbaland si ay ugu ansixiyaan aqlabiyadda hal dheeriga ee(1/2+1).
3. Garsooreyaasha Maxkamadda Dastuurku waxay dhexdooda ka dooranayaan guddoomiye iyo kuxigeenkiisa.
4. Maxkamadda Dastuurka Jubbaland waxa ay u hoggaansamsaa sharciga oo keli ah garsoor iyo maamul ahaanba.
5. Maxkamadda Dastuurka Jubbaland waa in ay yeelataa maamul uu hogaaminayo Xoghaye Guud
6. Haddii xubin ama ka badan ka bannanaato Maxkamadda Dastuurka waa in lagu soo buuxiyaa xubintaas muddo 45 beri gudahood ah.
7. Xarunta Maxkamadda Dastuurku waxay noqonaysaa caasimadda Jubbaland.
8. Qaab dhismeedka maxkamadda iyo awoodaha waxa qeexi doona sharci gaar ah.

Qodobka 56^{aad}: Awoodaha iyo Masuuliyadka Maxkamadda Dastuurka

1. Maxkamadda Dastuurku waxay awood u leedahay:
 - I. Inay buriso xeer, xeer-hoosaad, wareegto iyo amar maamul gabi ahaan ama qayb ahaan, sababo la xiriira in uu dastuurka ka hor imanayo.
 - II. Maxkamadda Dastuurku waxay xukuntaa dacwadda muwaadin uu ku dacwoonayo in xuquuqdiisa dastuuriga ah lagu xad gudbay.
 - III. Maxkamadda Dastuurku waxay go'aannadeeda waafajisaa ujeedooyinka Shareecada Islaamka iyo Dastuurka Jubbaland.
 - IV. Maxkamadda Dastuurku waxay go'aan ka gaartaa khilafaadka u dhexeeya hay'adaha dowlad Gobaleedka Jubbaland, awoodahooda iyo masuuliyadkooda dastuuriga ah.
 - V. Maxkamadda Dastuurku waxay ka jawaabtaa codsiyada uu usoo gudbiyo Baarlamaanka Jubbaland ee la xiriira dastuurka ama hindise sharciyeed u yaalla Baarlamaanka.
 - VI. Waxa ay go'aan ka gaartaa in ay dastuurka waafaqsiyaan mooshinnada xilka lagaga qaadayo Madaxweynaha Jubbaland.
2. Sharci gaar ah ayaa qeexi doona qaabka ay u fulinayso Maxkamadda Dastuurku masuuliyadkeeda.

Qodobk 57^{aad}: Hab-raaca Go'aannada Maxkamadda Dastuurka

1. Maxkamadda Dastuurku waxay ku go'aamisaa xukunnadeeda aqlabiyadda cod hal dheeri ah(1/2+1).
2. Go'aannada Maxkamadda Dastuurku waa in bulshadu ay ogaataa laguna soo saaraa faafinta rasmiga ah ee dowladda.Go'aannada Maxkamadda Dastuurka waa in xoghayuhu u diraa dadka ama hay'adaha ay khusayso.

Qodobka 58^{aad}: Shuruudaha Garsooreyaasha Maxkamadda Dastuurka

1. Garsooreyaasha Maxkamadda Dastuurka waa in ay buuxiyaan shuruudaha ku xusan qodobka 52aad ee dastuurkan.

Qodobka 59^{aad}: Sababaha Lagu Waayi Karo Xubinnimada Maxkamadda Dastuurka

1. Xubinnimada Maxkamadda Dastuurka waxaa lagu waayi karaa haddii garsooruhu:
 - I. Lumiyo shardi ka mid ah shuruudihii lagu soo xulay.
 - II. Geeriyoodo
 - III. Uu noqdo hawl gab joogta ah.
 - IV. Is casilo lagana aqbal.
 - V. Ku xadgudbo Shareecada Islaamka, Dastuurka Jubbaland ama shuruudca kale ee u yaalla dalka.
 - VI. Maxkamadi ku xukunto dembi xeer ciqaabeed.

Qodobka 60^{aad}: Guddiga Adeegga Garsoorka

1. Guddiga Adeegga Garsoorku waa in uu ahaadaa:
 - I. Xor, dhexdhexaad, dhinacna raacsanayn.
 - II. Hubiyaa in garsoorku xor yahay
 - III. Guddiga Adeegga Garsoorku waxa uu talo bixin ka siiyaa xukuumadda arrimaha garsoorka,
 - IV. Maamulaa hay'adaha garsoorka Jubbaland.
2. Guddiga Adeegga Garsoorku garsoorku wuxuu ka koobanyahay:
 - I. Guddoomiyaha Maxkamadda Sare.
 - II. Guddoomiyaha Maxkamadda Dastuurka.
 - III. Xeer Ilaaliyaha Guud.
 - IV. 2 qof oo bulshada ku leh ixtiraam oo ka mid ah ururrada bulshada rayidka, mid ka mid ihina tahay dumar.
 - V. 2 qareen oo madaxweynuhu kasoo magacaabay Ururka Qareenada Jubbaland.
 - VI. Waajibaadka iyo xilalka Guddiga Adeegga Garsoorka waxaa lagu qeexi doonaa sharci gaar ah oo baarlamaanku ansixiyo

Qodobka 61^{aad}: Awoodaha iyo Waajibaadka Guddiga Adeegga Garsoorka

1. Guddigu wuxuu leeyahay awoodaha iyo masuuliyadkan:
 - I. Soo jeedinta magacaabista, casilaadda, beddelaadda, iyo dallacsiinta xubnaha garsoorka Jubbaland.
 - II. Ka hor inta aan la aasaasin Guddiga Adeegga Garsoorka, garsooreyaasha maxkamaddaha waxaa soo jeedinaya Wasiirka Cadaaladda.

- III. Guddigu wuxuu masuul ka yahay maamulka shaqaalaha garsoorka.
- IV. Guddigu wuxuu aasaasaa, maamulaana goobaha tababarka garsooreyaasha iyo xoghayeyaashooda si ay u helaan tababar joogta ah oo la xiriira aqoontooda farsamo.
2. Sharciga lagu aasaasayo Guddiga Adeegga Garsoorku waa in uu qeexaa qaabka loo soo xulayo garsooreyaasha iyo hawl wadeenada kale ee garsoorka.
3. Talo bixinta Guddiga Adeegga Garsoorka ee la xiriirta magacaabista, casilaadda, dallacsiinta, beddelaadda garsooreyaasha maxkamadaha, ku xigeennada Xeer Ilaaliyayaasha Jubbaland, waxa ay ku xiran tahay ogolaanshaha Golaha Wasiirada, waana in lagu soo saaraa wareegto Madaxweyne.

Qodobka 62^{aad}: Xafiiska Xeer Ilaaliyaha Guud ee Jubbaland

1. Xafiiska Xeer Ilaaliyaha Guud:
 - I. Wuxuu ka jawaabaa arrimaha sharciga.
 - II. Wuxuu u hoggaansamaa sharciga oo keliya.
 - III. Xarunta Xafiiska Xeer Ilaaliyaha Guud waa caasimadda Jubbaland.
2. Awoodda Xeer Ilaaliyaha Guud waxay ku baahsan tahay Jubbaland oo dhan.
3. Xafiiska Xeer Ilaalinta Guud wuxuu ka kooban yahay:
 - I. Xeer Ilaaliyaha Guud ee Jubbaland.
 - II. Kuxigeenka Xeer Ilaaliyaha.
 - III. Xeer Ilaaliyayaasha Gobollada.
4. Xeer Ilaaliyaha Guud iyo ku xigeenkiisu waxay derejo ahaan la siman yihiin garsooreyaasha maxkamadda sare.
5. Xeer Ilaaliyayaasha Gobolladu waxay lamid yihiin xagga derejada garsooreyaasha maxkamadaha racfaanka. Waxaa soo jeedinta magacaabiddooda, dallacsiintooda, beddelaaddooda iyo casilaaddooda awood u leh Wasaaradda Caddaaladda.
6. Xeer Ilaaliyayaasha waxay leeyihiin xuquuq iyo xasaanad la mid ah tan garsooreyaasha.

Qodobka 63^{aad}: Shuruudaha iyo Magacaabidda Xeer Ilaaliyaha Guud iyo KuXigeenkiisa

1. Golaha Fulinta ayaa soo jeedinaya magacaabidda Xeer Ilaaliyaha Guud iyo kuxigeenkiisa. Waxa wareegto ku soo saaraya magacaabistooda Madaxweynaha ka dib marka baarlamaanku ansixiyo.
2. Shuruudaha u yaalla Xeer Ilaaliyaha Guud iyo kuxigeenkiisa:
 - I. Waa inuu yahay muwaadin Soomaaliyeed oo Muslim ah
 - II. Waa in aanay da'diisu ka yarayn 40 sano.
 - III. Waa inuu haysto shahaado jaamacadeed bartayna sharciga,
 - IV. Leeyahay khibrad shaqo oo shan (5) sano oo garsoorennimo ah, ama lix (6) sano oo qareennimo ah.

Qodobka 64^{aad}: Awoodaha iyo Waajibaadka Xafiiska Xeer Ilaaliyaha Guud

1. Xafiiska Xeer Ilaalinta Guud wuxuu awood u leeyahay inuu dacwad ku soo oogo, kuna mudaco saraakiisha sare ee dawladda maxkamadda horteeda.

2. Xafiiska Xeer Ilaaliyaha Guud wuxuu leeyahay masuuliyadkan:
 - I. Dhaqan gelinta shuruucda iyo ka hortagga falal dembi oo ka dhaca Jubbaland.
 - II. Agaasinka, baaritaannada, oogidda dacwadaha falal dembiyeedyada iyo maxkamadayntooda.
 - III. Wuxuu kormeeraa xaaladaha xabsiyada iyo goobaha dhaqan celinta.
 - IV. Wuxuu ilaaliyaa, difaacaa xuquuqda ilmaha, agoonta, dadka dhimirkoodu dhimanyahay iyo cidkasta oo u baahan daryeel sharci.
 - V. Waxa uu gutaa xilalka iyo waajibaadka kale ee uu siiyo sharcigu.
 - VI. Wuxuu faafinta rasmiga ah ku soo saaraa shuruucda, wareegtooyinka iyo heshiisyada uu madaxweynuhu saxiixo.
 - VII. Wuxuu kaydiyaa shuruucda, go'aanada iyo heshiisyada caalamiga ah.
 - VIII. Wuxuu ilaaliyaa hantida dawladda, gudaha iyo dibedda Jubbaland.
 - IX. Wuxuu dhexdhexaadiyaa hay'adaha dowladda.
 - X. Shuruudaha, awoodaha iyo masuuliyadka Xeer Ilaaliyaha Guud waxaa lagu qeexi doonaa sharci gaar ah oo uu baarlamaanku ansixiyo

Qodobka 65^{aad}: Awoodaha iyo Masuuliyadka Kuxigeenka Xeer Ilaaliyaha Guud

1. Marka uu maqanyahay Xeer Ilaaliyaha Guud, ama uu si kumeel gaar ah xilkiisa u gudankari waayo, masuuliyadkiisa waxaa la wareegaya kuxigeenkiisa.
2. Wuxuu kala taliyaa Xeer Ilaaliyaha Guud arrimaha Xeer Ilaalinta.
3. Kuxigeenku wuxuu qabtaa shaqada uu Xeer Ilaaliyaha Guud u xilsaaro isagoo gudanaya waajibaadka xafiiska Xeer Ilaaliyaha Guud.

Qodobka 66^{aad}: Xil Ka Qaadista Xeer Ilaaliyaha Guud iyo Kuxigeenkiisa

1. Xeer Ilaaliyaha Guud iyo ku xigeenkiisa waxaa keliya oo xilka looga qaadi karaa si sharciga waafaqsan.
2. Xeer Ilaaliyaha Guud iyo Ku Xigeenkiisa waxay xilka ku waayi karaan haddii lagu qabto iyagoo faraha kula jira fal dembiyeed, ama maxkamadi kuriddo xukun kama dambays ah.
3. Marka farqadaha (1), (2) ee qodobkani ay dhacaan, waxaa xil ka qaadista soo jeedinaya Golaha Xukuumadda, una gudbinaya Golaha Baarlamaanka, si ay xasaanadda uga qaadaan, loona maxkamadeeyo Xeer Ilaaliyaha iyo Kuxigeenkiisa.

CUTUBKA 4^{aad}: Doorashooyinka Dawlad Goboleedka Jubbaland

Qodobka 67^{aad}: Doorashooyinka Guud

1. Xilliga ku meel gaarka ah ka dib Madaxweynaha, Ku Xigeenkiisa, Golaha Baarlamaanka iyo Goleyaasha Deegaanka toos ayaa loo soo dooranayaa.
2. Cod bixinta waa in ay si caddaalad ah, xor ah, waafaqsanna nidaamka sharciga ah u dhacdaa, una maamulaan Guddiga Doorashooyinka iyo Xuduuduha Jubbaland.
3. Waxa reebban in qof lagu farageliyo cidda uu dooranayo.
4. Waqtiga ay dhacayso doorashadu waxa go'aaminaya Guddiga Madaxa Bannaan ee Doorashooyinka iyo Xuduudaha Jubbaland.
5. Bilowga xilliga doorashadu waa in aanay ka yaraan lix (6) toddobaad ka hor maalinta ay doorashadu bilaabanayso.
6. Sharci gaar ah oo ku aaddan doorashooyinka Madaxweynaha, Madaxweyne ku Xigeenka iyo xubnaha Barlamaanka Jubbaland waa in la ansixiyaa xilliga kala guurka ah.

Qodobka 68: Qaabka Doorashada Madaxweynaha

1. Xilliga kooraad ka dib marka la ansixiyo Dastuurka Ku Meel Gaarka ah ee Jubbaland doorashooyin guud kama qabsoomayaan Jubbaland.
2. Barlamaanka Jubbaland ayaa dooranaya Madaxweynaha, muddada xilkuna waa afar (4) sano. Taas oo lagu cusboonaysiin karo doorashooyin guud hal (1) mar..
3. Muddada ku meel gaarka ah Madaxweyne ku Xigeenka waxa soo magacaabaya Madaxweynaha, Barlamaankuna wuxuu ku ansixinayaa cod hal dheeri (50% +1)

Qodobka 69^{aad}: Shuruudaha Musharraxa Madaxweynenimada

1. Tartanka madaxweynenimadu waa u furan yahay muwaadin kasta haddii uu buuxiyo shuruudaha soo socda:
 - a. Muwaadin Soomaaliyeed oo reer Jubbaland ah
 - b. Yahay Muslim
 - c. Haysto shahaado jaamacadeed ama leeyahay ugu yaraan 10 sano oo ah khibrad maamul ama hoggaamin,
 - d. Caafimaadka iyo dhimirkisuna taam yahay
 - e. Yahay ugu yaraan afartan (40) sano jir
 - f. Ku sifoobay daacadnimo iyo asluub wanaagsan
 - g. Maxkamadi ku xukumin dembi xeer ciqaabeed ah

Qodobka 70^{aad}: Muddada Xil Haynta:

Madaweynaha iyo Madaxweyne ku Xigeenka waxa ay xilka haynkaraan muddo afar (4) sano ah, laga soo billaabo taariikhada la shaaciyay natiijada doorashada, waxaana xilka loo dooran karaa laba (2) jeer .

Qodobka 71^{aad}: Qaabka Doorashada Madaxweynaha Dawlad Goboleedka Jubbaland Muddada Ku Meel Gaarka ah

1. Barlamaanka Jubbaland waa in uu soo doortaa madaxweynaha Jubbaland.
2. Fadhiga doorashada madaxweynahana waxa guddoominaya Afhayeenka Barlamaanka Jubbaland.
3. Ugu yaraan 2/3 (seddex meelood, laba meel) tirada guud ee xubnaha Barlamaanka Jubbaland waa in ay soo xaadiraan doorashada Madaxweynaha.
4. Murashaxnimada xilka madaxweynenimada waa in ay soo jeediyaan ugu yaraan 10 xildhibaan.
5. Marka xildhibaanada Barlamaanka Jubbaland ay u codaynayaan doorashada madaxweynaha xildhibaan kastaa wuxuu leeyahay hal cod.
6. Musharrax kasta oo u taagan xilka madaxweynenimo waa in uu u caddeeyo Barlamaanka Jubbaland, una soo bandhigo bamaamijkiisa doorasho.
7. Doorashada madaxweynuhu waa in ay u dhacdaa sida soo socota:
 - a. Doorashada Madaxweynuhu waa cod bixin qarsoodi ah
 - b. Musharraxii hela 2/3 (seddex meelood, laba meel) codadka xildhibaanada Barlamaanka Jubbaland ee goobjoogga ah ayaa loo dooranayaa madaxweynenimada Jubbaland.
 - c. Haddii musharraxna uu heli waayo aqlabiyadda 2/3 (seddex meelood, laba meel) wareegga koowaad, wareegga labaad ee codbixinta waxa ka qayb gelaya afarta musharrax ee hela codadka ugu badan wareegga koowaad, musharraxii hela 2/3 (seddex meelood, laba meel) codadka wareegga labaad ayaa noqonaya madaxweynaha la doortay ee Jubbaland.
 - d. Haddii musharaxna uu heli waayo aqlabiyadda 2/3 (seddex meelood, laba meel) ee loo baahan yahay wareegga labaad, wareegga seddexaad ee codbixinta waa in ay u tartamaan labada musharrax ee hela codadka ugu badan wareegga labaad, musharraxii ku guulaysta codadka ugu badan wareegga seddexaad ayaa noqonaya madaxweynaha la doortay ee Jubbaland
 - e. Haddii ay u tartamayaan 2 musharrax doorashada madaxweynaha, waxa loo codaynaya hal wareeg oo keli ah. Musharraxa hela cod hal dheeri ah (50%+1) ayaa ku guulaysanaya tartanka.

Qodobka 72^{aad}: Awoodaha iyo Musuuliyadka Madaxweynaha Jubbaland

1. Madaxweynuhu waa masuulka ugu sarreeya dawladda, ahna madaxa Golaha Fulinta. Madaxweynuhu waa astaanta midnimada shacabka Jubbaland.
2. Madaxweynuhu wuxuu masuul ka yahay in uu ilaaliyo dastuurka iyo shuruucda kale ee dalka u yaalla.
3. Madaxweynuhu waxa uu ka soo magacaabi karaa xukuumadda xubnaha baarlamaanka iyo dad aan xubno ka ahaynba.
4. Madaxweynuhu kama maqnaan karo Jubbaland muddo ka badan 30 beri oo xiriir ah, haddii aanay jirin xaalad caafiimaad darro ah oo aan u saamaxaynin.
5. Asagoo latashanaya kuxigeenkiisa, Madaxweynuhu wuxuu awood u leeyahay inuu soo magacaabo, casilana xubnaha Golaha Fulinta ee xukuumadda, madaxda xafiisyada madaxa bannaan, iyo madaxda kale ee dawladda ee dastuurkan ama shuruucda kale ee Jubbaland

awood u siinayso inuu soo magacaabo ama xilka ka qaado.

6. Madaxweynuhu wuxuu ogolaadaa, ama diidaa siyaasada maamulka oo ay xukuumaddu rabto inay fuliso, asagoo raacaya dastuurka iyo shuruudka kale ee dalka u yaalla.
7. Madaxweynuhu waxa uu kala xaajoodaa Dawladda Federaalka ah ee Soomaaliya sida ay uga qayb gelayso Dawlad Goboleedka Jubbaland Jamhuuriyadda Federaalka ee Soomaaliya, heshiisyana la galaa Xukuumadda Federaalka, kuwaas oo u baahan in ay ansixiyaan Golaha Wasiirada iyo Parlamaanka Jubbaland.
8. Madaxweynuhu wuxuu qaabilaa wufuudda caalamiga ah ee booqashada rasmiga ah ku yimaadda Jubbaland.
9. Madaxweynuhu wuxuu bixiyaa billad sharaf la guddoonsiiyo muwaadinka ama ajnabiga mutaysta.
10. Madaxweynuhu wuxuu cafis u fidiyaa maxaabiista xiran asagoo latashanaya garsoorka.
11. Madaxweynuhu wuxuu furaa, khudbadna ka jeediyaa kalfadhida Baarlamaanka.
12. Madaxweynuhu wuxuu soo saaraa wareegto uu kusoo rogayo xaalad deg-deg ah si looga hortago:
 - a. Musiibooyinka dabeeciga ah sida abaaro, duufaanno, iyo
 - b. Rabshado ama kacdoon sharci darro ah oo gudaha Jubbaland ka dhaca.
13. Madaxweynuhu waa inuu u gudbiyaa wareegto ku saabsan xaaladaha deg-degga ah Baarlamaanka Jubbaland 30 beri gudahood sida ku cad qodobada Dastuurkan.
14. Madaxweynuhu waa in uu si rasmi ah ugu dhawaaqo taariikhda la qabanayo doorshada ka dib marka ay go'aamiyaan Guddiga Doorashooyinka iyo Xuduudaha Jubbaland.
15. Madaxweynuhu wuxuu soo saaraa xeerar ay go'aamiyeen Golaha Wasiirada si loo fuliyo qawaaniinta Parlamaanku ansixiyey. Xeerasha madaxweynuhu kama hor imaan karaan shuruudka Parlaman ku soo saaro.
16. Madaxweynuhu wuxuu gutaa masuuliyadka iyo awoodaha sharciga Jubbaland uu siiyey.
17. Madaxweynuhu wuxuu soo magacaabaa Guddoomiyaha iyo Garsooreyaasha Maxkamadda Sare ka dib marka ay soo jeediyaan Guddiga Addeegga Garsoorku.
18. Madaxweynuhu wuxuu magacaabaa guddoomiyaha, garsooreyaasha iyo xeer ilaaliyayaasha Maxkamadda Ciidamada Jubbaland.

Qodobka 73^{aad}: Awoodaha iyo Masuuliyadka Madaxweyne Ku Xigeenka Jubbaland

1. Madaxweyne Ku Xigeenku wuxuu la wareegayaa masuuliyadka Madaxweynaha marka uu dalka ka maqan yahay ama si ku meel gaar ah ay xil-gudasho la'aani ku dhacdo.
2. Madaxweyne ku Xigeenku waa inuu katala bixiyaa soo magacaabidda iyo casilaadda wasiirada iyo wasiir kuxigeennada iyo masuuliyiinta sar-sare ee dawladda Jubbaland.
3. Madaxweyne kuxigeenku wuxuu qabtaa xilalka madaxweynuhu u xilsaaro ee ka midka ah awoodaha Madaxweynaha
4. Haddii madaxweynuhu iscasilo, geeriyoodo, la casilo ama hawsha u gudan waayo caafimaad darro awgeed, Madaxweyne kuxigeenka ayaa loo dhaarinayaa Madaxweyne, waxaanu dhammaystirayaa muddada xilka ka hartay.
5. Haddii arimaha ku xusan farqadda 4aad ee qodobkani ay dhacaan, Parlamaanka Jubbaland waa in uu Madaxweyne ku xigeen cusub ku doortaa muddo 30 beri gudahood ah.

- Haddii Madaxweynaha iyo ku Xigeenkiisuba ay hal mar wada geeriyoodaan, is-casilaan, la casilo, Afhayeenka Baarlamaanka ayaa la wareegaya masuuliyadkooda illaa lagasoo dooranayo madaxweyne iyo kuxigeenkiisa muddo 60 beri gudahood ah.

Qodobka 74^{aad}: Xil Ka Qaadista Madaxweynaha iyo Madaxweyne Ku Xigeenka

- Baarlamaanku waxay soo jeedin karaan xil ka qaadista Madaxweynaha ama Madaxweyne ku Xigeenka haddii lagu helo khiyaano ama inuu jebiyey dastuurka iyo shuruucda kale ee u yaalla Jubbaland.
- Mooshinka Madaxweynaha ama Ku Xigeenkiisa xilka looga qaadayo waxaa soo jeedin kara ugu yaraan 1/3 (saddex meelood hal meel) ee tirada guud xildhibaannada Baarlamaanka. Haddii la ansixiyo waa in loo gudbiyo Maxkamadda Dastuurka ee Jubbaland oo hoggaamin doonta kiiska ka dhanka ah madaxweynaha ama ku xigeenkiisa in uu aasaas sharci ah ku qotomo.
- Madaxweynaha ama ku xigeenkiisa waxaa xil kaqaadis ku samayn kara ugu yaraan 2/3 (saddex meelood laba meel) ee tirada guud ee xildhibaannada Jubbaland kadib marka maxkamadda dastuurka ay soo caddeyso eedaynta ah in uu jebiyey dastuurka ama shuruucda kale ee u yaalla Jubbaland.
- Haddii xil ka qaadis lagu sameeyo madaxweynaha si waafaqsan dastuurka, Madaxweyne Ku Xigeenku waa in uu la wareegaa xilka, dhammaystiraana mudada ka dhiman xilliga xilka.
- Haddii xil ka qaadis lagu sameeyo Madaxweyne ku xigeenka si waafaqsan dastuurka, Madaxweynuhu waa in uu soo magacaabaa Madaxweyne Ku Xigeen una gudbiyaa baarlamaanka si ay ugu ansixiyaan cod hal dheeri ah (50%+1).

Qodobka 75^{aad}: Is Casilidda Madaxweynaha

- Haddii uu madaxweynuhu iscasilo, wuxuu warqad rasmi ah, oo uu isku casilayo u qorayaa Afhayeenka Baarlamaanka.

Qodobka 76^{aad}: Qaabka Dhaarinta Madaxweynaha Jubbaland

Inta aanu la wareegin xilka, Madaxweynaha waa in lagu dhaariyaa Baarlamaanka hortisa. Waxa dhaarintu Guddoomiyaha Maxkamadda Sare ama Af hayeenka Baarlamaanka. Dhaartu waa inay u dhacdaa qaabkan:

“waxaan ku dhaaranayaa magaca Ilaahay in aan xilkayga u guto si daacad ah, oo danta dadka, diinta, iyo dalku ay ku jirto, dhawrana dastuurka iyo shuruucda kale ee dalka u yaalla.”

Qodobka 77^{aad}: Doorashada Afhayeenka iyo Ku Xigeennadiisa

1. Fadhiga 1aad oo uu hoggaaminayo xildhibaanaka ugu da'da weyn, waa in baarlamaanku iska dhex doorto Afhayeen iyo 2 Afhayeen Ku Xigeen.
2. Haddii ay maqan yihiin afhayeenka iyo afhayeen ku Xigeenadu, waxa xildhibaanadu ay u dooranayaan xubin kale si uu u guddoomiyo kulanka si ku meel gaar ah.
3. Inta aanu la wareegin xafiiska, afhayeenku waa inuu iska casilaa haddii uu xil rasmi ah ka hayo xisbi siyaasadeed, waana inuu noqdaa dhexdhexaad muddada uu gudanayo waa-jibaadkiisa.
4. Afhayeenka iyo 2da kuxigeen waa in lagu soo doortaa cod-bixin qarsoodi ah, aqlabiyadda tirada guud ee xubnaha Baarlamaanka. Waxaa xilka looga qaadi karaa aqlabiyadda 2/3 (sed-dex meelood labo meel) codadka xubnaha Baarlamaanka Jubbaland.

CUTUBKA 5^{aad}: Guddiyada Madaxa Bannaan

Qodobka 78^{aad}: Mabaadi'da Guud

1. Guddi Madaxa Bannaani waa hay'ad xor ka ah faragelinta xukuumadda iyo siyaasadda, una isticmaali karta khibradeeda hawl gaar ah.
2. Guddi Madax Bannaani waa inay ilaalisaa mabaadii'da xuquuqul insaanka, dimoqraadiyadda iyo hufnaanta.
3. Guddi Madax Bannaani waa inay xor ka tahay faragelinta shakhsi ama laamaha kale ee xukuumadda.
4. Miisaaniyadda Guddiyada Madaxa Bannaan waa in lagu qoondeeyo miisaaniyad san-nadeedka Baarlamaanku ansixiyo.

Qodobka 79^{aad}: Aasaaska Guddiyada Madaxa Bannaan

Dowladda Jubbaland waa in ay yeelato guddiyo madax bannaan oo waajibaadkooda lagu qeexi doono shuruuc gaar ah oo Baarlamaanku ansixiyo.

Qodobka 80^{aad}: Guddiga Madaxa Bannaan ee Xuquuqul Insaanka

1. Waa in la dhiso Guddiga Madaxa Bannaan ee Xuquuqul Insaanka oo ka u xilsaaraan doona:
 - a. Xoojinta xuquuqul Insaanka, dhaqanka dhawrista xuquuqda aadanaha.
 - b. Ilaalinta, Horumarinta iyo adkaynta xuquuqul insaanka.
 - c. Kormeerka, qiimaynta iyo la socodka dhawrista xuquuqul insaanka ee Jubbaland.
2. Guddiga Xuquuqul Insaanku waa inay qabato hawlahaan:
 - a. Dabagalka, kawarbiginta iyo la socodka tacadiyada loo geysto xuquuqul insaanka.
 - b. Wax kaqabashada ku habboon falalka kadhanka ah xuquuqul insaanka.
 - c. Samaynta cilmi baaris.
 - d. Wacyi-gelinta bulshada ee arrimaha xuquuqul insaanka.
3. Hay'adda xuquuqul insaanku waa inay tahay xor, dhexdhexaad iyo mid loo dhan yahay
4. Xubnaha hay'adda xuquuqul insaanka waxay ka koobnaanayaan shan (5) xubnood, oo laba ka mid ah tahay dumar.
5. Qaab dhismeedka, awoodaha iyo masuuliyadka hay'adda xuquuqul insaanka waxa lagu qeexi doonaa sharci uu baarlamaanku soo saari doono.

Qodobka 81^{aad}: Guddiga Madaxa Bannaan ee la Dagaallanka Musuqmaasuqa

1. Jubbaland waa in ay yeelataa Guddiga ladagaallanka musuqmaasuqa oo u xilsaaran in ay dabagalaan arrimaha la xiriira musuqmaasuqa hantida dadweynaha.
2. Guddigu waxay awood u leeyihiin inay iskood baaritaanno u billaabaan, iyadoo lasoo gaarsiin wax dacwad ah si looga hortago musuqmaasuq inuu dhaco.
3. Guddigu waxay leeyihiin Masuuliyadkan:

- a. waxay xoojiyaan tallaabooyinka lagaga hortagayo musuqmaasuqa.
- b. waxay xoojiyaan, taageeraanna iskaashiyada caalamiga ah ee kahortagga musuqmaasuqa.
- c. waxay xoojiyaan la xisaabtanka iyo maamulka suuban ee hantida dadweynaha.
4. Awoodaha guddiga la dagaallanka Musuqmaasuqa waxaa ka mid ah:
 - a. Waxay baaraan, joojiyaan, faafiyaan warbixinnada falalka musuqmaasuqa.
 - b. Waxay xayiraan, lawareegaaanna faa'iidooyinka laga helo falal danbiyeedka.
 - c. Waxay caawiyaan soo jeedinta sharci qabyo qoraal ah oo fududayn kara dacwadaha ka dhanka ah musuqmaasuqa.
5. Awoodda Guddiga La Dagaallanka Musuqmaasuqa waxa ka mid ah arrimaha la xiriira:
 - a. Waxay daba galaan musuqmaasuqa masuuliyiinta muwaadiniinta ah ama ajnabi ah ama hawl wadeennada hay'adaha caalamiga ah, iyadoo la tixgelinayo heshiisyada dawladda Federaalka ee Soomaaliya ay la gasho hay'adaha caalamiga ah iyo shuruucda ay Soomaaliya saxiixday.
 - b. Waxay ka hortagaan xatooyada masuuliyiinta ay kula kacaan hantida dadweynaha iyo midda gaarka loo leeyahay.
 - c. Waxay ka hortagaan khalkhal gelinta ganacsiga.
 - d. Ka faa'iidaydiga sharci darrada ah.
6. Guddigu waa xor, dhexdhexaad, waxayna matalaan bulshada.
7. Xubnaha guddigu waa toddoba (7) oo ugu yaraan 2 ka mid ah ay dumar yihiin.
8. Sharci gaar ah ayaa qeexaya qaab dhismeedka iyo waajibaadka guddigan oo baarlamaanku ansixin doono.

Qodobka 82^{aad}: Guddiga Xallinta Khilaafaadka Isticmaalka Dhulka iyo Dib u Heshiisiinta

1. Jubbaland waa inay yeelataa Guddiga Madaxa Bannaan ee Xallinta khilaafaadka Isticmaalka Dhulka iyo Dib u Heshiisiinta oo dhiirgelin doona samaynta siyaasado ku saabsan isticmaalka dhulka iyo nidaamka lahaanshaha dhulka ee Jubbaland, si loo hubiyo in uu cadaaladda iyo sinnaanta ku qotomo.
2. Guddigu waa in ay dhiirgeliyaan dib u heshiisiinta iyo midnimada bulshada, hubiyaanna in arrimaha la xiriira khilaafaadka isticmaalka dhulka lagu xalliyo qaab sharci ah.
3. Xubanaha ka mid noqonaya guddigan waa in aanay ka badan toddoba (7), ugu yaraanna laba (2) ay dumar noqdaan.
4. Masuuliyadka, waajibaadka iyo qaab dhismeedka Guddigan waxaa lagu qeexi doonaa sharci gaar ah oo Baarlamaanka Jubbaland soo saari doono.

Qodobka 83^{aad}: Guddiga Madaxa Bannaan ee Ciidamada Amniga

1. Jubbaland waxa ay yeelanaysaa Guddiga Madaxa Bannaan ee ciidamada amniga oo ah guddi madax bannaan, oo kakooban khubaro ku takhasusay dhanka amniga iyo arrimaha bulshada.
2. Waajibaadka hay'adda waxaa ka mid ah:
 - a. Inay baarto, horumariso qaab amni oo u adeegaya masaalixda Jubbaland.
 - b. Inay u soo hindiseyaal ku saabsan arrimaha ammaanka iyo qaabkii loo sugi lahaa ammaanka guud ee Jubbaland.
 - c. Inay soo jeediyaan qaab lagu kormeero kharashaadka laamaha amniga.

- d. Inay u raadiso magdhaw dhibbanayaasha wax yeello ay u geysteen laamaha amnigu.
3. Awoodaha guddiga waxa ka mid ah:
 - a. Ka hortagga arrimaha burcad badeedda.
 - b. Dhaqan-celinta maleeshiyaadka si ay uga mid noqdaan bulshada.
 - c. In ay u raadiyaan magdhaw ciidamada ku wax yeeloobay iyagoo gudanaya waajibaadkooda.
4. Waa inay guddigu soo dhisaa guddi hoosaadyo ka kooban khubaro takhasus u leh arrimaha amniga si ay u fuliso hawlaheeda.
5. Guddigu waxay ka kooban tahay 5 xubnood oo ay ugu yaraan 2 ka mid ahí dumar yihiin. Waxa xubnaha guddiga soo jeedinaya Golaha Fulinta, waxaana ansixinaya Baarlamaanka.
6. Golaha Baarlamaanku waa in uu ansixiyaa sharci lagu aasaasayo qaab dhismeedka iyo waajibaadka Guddiga Madaxa Bannaan ee Ciidamada Amniga.

Qodobka 84^{aad}: Guddiga Madaxa Bannaan ee Nabadda iyo dib u Heshiisiinta

1. Waa in la aasaasaa Guddiga Madaxa Bannaan ee Nabadda iyo Dib u Heshiisiinta si loo dhiirigeliyo
 - a. Dib u heshiisiin iyo midnimada bulshada
 - b. In arrimaha la xiriira aargoosiga, gabboodfalada iyo arrimaha kale ee dhaliya rabshadaha loo xalliyo
 - c. Hubinta in sharciga iyo arrimaha dawladdu hagayso la raaco.
2. Guddiga Nabadda iyo dib u heshiisiinta waa xor, dhex-dhexaad, loona dhan yahay
3. Waxa xubnaha guddiga ka mid noqonaya odayaasha dhaqanka, xildhibaanada Baarlamaanka Jubbaland, ururada bulshada rayidka ah, garsooreyaasha iyo ciidamada ammaanka.
4. Baarlamaanka Jubbaland ayaa ansixin doona sharci gaar ah oo qeexaya awoodaha iyo masuuliyadaha guddiga madaxa bannaan ee ammaanka iyo dib u heshiisiinta.

Qodobka 85^{aad}: Guddiga Madax Bannaan ee Adeegga Shaqaalaha Rayidka ah

1. Dowlad Goboleedka Jubbaland waxay yeelanaysaa Guddiga Madaxa Bannaan ee Adeegga Shaqaalaha Rayidka.
2. Qaab dhismeedka, awoodaha, iyo masuuliyadaha guddiga waxaa lagu qeexi doona sharci gaar ah.

Qodobka 86^{aad}:Soo Magacaabista Guddiyada Madaxa Bannaan

1. Haddii aanu dastuurku qeexayn, wasiirrada ay khusayso ayaa soo jeedinaya magacyada xubnaha xafiisyada madaxa bannaan. Haddii wasiirradu ay ansixiyaan xubnaha ka mid noqonaya guddiyada iyo xafiisyada madaxa bannaan, waxaa loo gudbinayaa Baarlamaanka si ay u ansixiyaan. Ka dib Madaxweynaha ayaa wareegto ku soo saaraya magacaabistooda.
2. Xubnaha ka mid noqonaya guddiyada iyo xafiisyada madaxa bannaan waa in ay soo maraan nidaam hufan oo si caddaalad ah loogu tartamayo, kuna salaysan aqoon maamu- leed iyo khibrad.
3. Waa inuu Guddiga Shaqaalaha Rayidka ee Jubbaland kormeeraa qaabka shaqaalaha xub- naha ka noqonaya guddiyada iyo xafiisyada madaxa bannaan lagu soo xulayo.

Qodobka 87^{aad}:Qaab Sharciyeedka Guddiyada Madaxa Bannaan

Barlamaanku waa inuu sameeyaa qaab sharciyeed lagu maamulayo guddiyada madaxa ban- naan.

CUTUBKA 6^{aad}: Xafiisyada Madaxa Bannaan

Qodobka 88^{aad}: Xafiiska Hanti Dhawrka Guud ee Jubbaland

1. Waa in uu jiraa Xafiiska Hanti Dhawrka Guud
2. Xafiiska Hanti Dhawrka Guud xaruntiisu waa caasimadda Jubbaland, wuxuuna ka shaqeeynaya dhammaan deegaannada kale Jubbaland oo dhan.
3. Hanti Dhawrka Guud magacaabistiisa iyo casilaaddiisa waxaa soo jeedinaya Golaha Wasiirrada iyadoo loo marayo Baarlamaanka si ay u ansixiyaan.
4. Shuruudaha laga rabo Hanti Dhawrka Guud waa:
 - a. Inuu yahay qof reer Jubbaland ah.
 - b. In aysan da'diisu ka yareen 40 sano.
 - c. In uu haysto shahaado heer jaamacadeed iyo aqoon xirfadeed oo cilmiga xisaabaadka iyo khibrad aan ka yarayn shan (5) sano.
5. Hawl wadeennada kale ee xafiiska Hanti Dhawrka waa in lagusoo xulaa si caddaalad ah oo daahfuran ayna kormeeraan xulistooda Guddiga Adeegga Shaqaalaha Rayidka ee Jubbaland.
6. Nidaamka iyo qaab maamuleedka Xafiiska Hanti Dhawrka Guud waxaa lagu qeexi doona sharci gaar ah.

Qodobka 89^{aad}: Awoodaha iyo Masuuliyadka Hanti Dhawrka Guud

1. Hanti Dhawrku wuxuu leeyahay awoodaha iyo masuuliyadkan:
2. La dagaallanka musuqmaasuqa ee dhammaan hay'adaha dowlad goboleedka Jubbaland.
3. Kormeeridda dakhliga iyo kharashaadka ka baxa hay'adaha dowladda.
4. Hubinta in kharashaadku ay ku baxaan iyadoo la raacayo shuruudca miisaaniyadda Jubbaland.
5. Hubinta in kharashaadka baxaya loo isticmaalo sidii loogu qoondeeyey miisaaniyadda.
6. Kormeeridda hay'adaha Jubbaland, dawladda hoose, hay'adaha madaxa bannaan iyo hay'ad kasta oo maareysa hantida dadweynaha iyadoo la raacayo qawaaniinta iyo qaab xisaabeedka Jubbaland.
7. Wuxuu hubiyaa ku takrifalka hantida dadweynaha ay maareeyaan shaqaalaha hay'adaha dawladda iyo kuwa caalamiga ah,
8. Ku soo rogidda ganaax lacageed ciddii lagu helo musuqmaasuq. Haddii baaritaannadu ay caddeeyaan in falal dembiyeed dhaceen, Hanti Dhawrku wuxuu u gudbinayaa kiiska Xeer Ilaalinta Guud si dacwad loogusoo oogo.

Qodobka 90^{aad}: Bangiga Jubbaland

1. Bangiga Dawlad Goboleedku waa hay'ad madax bannaan, wuxuuna masuul ka yahay:
 - a. Qasnadda dawladda goboleedka Jubbaland
 - b. Wuxuu kormeeraa bangiyada ganacsi iyo maaliyadeed ee ka hawlgala Jubbaland.
2. Bangiga waxaa agaasimaya toddoba (7) xubnood oo kala ah:
 - a. Guddoomiyaha Bangiga.

- b. Agaasimaha Guud ee wasaaradda maaliyadda.
 - c. 3 xubnood oo aqoon sare u leh arrimaha dhaqaalaha iyo maaliyadda.
 - d. 2 xubnood oo rugta ganacsigu soo magacaabayso.
 - e. Xubin kale oo aan codeyn karin oo laga soo magacaabayo Bangiga Jubbaland.
3. Guddoomiyaha bangiga Jubbaland waxaa soo magacaabaya Golaha Fulinta.
 4. Waxaa xilka lagaga qaadi karaa haddii uu jebiyo sharciga. Magacaabistiisa iyo casilaaddiisaba waa in barlamaanka laga ansixiyo.
 5. Nidaamka maamulka ee bangigu ku shaqeynayo waxaa qeexi doona sharci gaar ah. Xeer uu meelmarin doono Baarlamaanka Jubaland ayaa qeexi doona qaab dhismeedka, sharciga uu ku shaqanayo iyo waajibaadka Bangiga Jubaland. Shuruucdaasi waxay aasaasi doonaan nidaamka maamulka maaliyadda ee Sanduuq Midaysan ee Bangiga Dawladda Jubaland. Lacagaha soo gasha ama loogu yabooho waxa ay ka mid noqonayaan Sanduuqa Midaysan ee Bangiga Dawladda Jubaland ,waa in lagu shubaa xisaab khaas ah oo ka furan Bangiga. Waxa reebban in laga saaro kharash Sanduuqa Midaysan ee Dawladda Jubaland. Waxa Sanduuqa kharash looga saari karaa wareegto ka soo baxday Fulinta, uuna ansixiyay Barlamaanka Jubaland.

Qodobka 91^{aad}. Ciidamada Amniga ee Jubbaland

1. Ciidamada Dowlad Goboleedku waxay ka kooban yihiin:
 - a. Ciidamada Booliiska.
 - b. Ciidamada Asluubta iyo Xabsiyada.
 - c. Ciidamada Sirdoonka.
 - d. Ciidamada Daraawiishta.
 - e. Ciidamada Ilaalada Xeebaha.
2. Xeer gaar ah ayaa qeexi doona qaab dhismeedka iyo masuuliyadka dhammaan ciidamada amniga.

CUTUBKA 7^{aad}: XIRIIRKA DAWLADDA DHEXE EE FEDERAALKA AH

Qodobka 92^{aad}: Xiriirka Dawlad Goboleedka Jubbaland iyo Jamhuuriyadda Federaalka ee Soomaaliya.

Jubbaland waxay xubin ka tahay Dowladda Federaalka ah ee Soomaaliya.

1. Xiriirka ka dhexeeya Dowladda Federaalka ah iyo Jubbaland waxa hagaya cutubka shanaad (5) iyo (12) ee Dastuurka Jamhuuriyadda Federaalka ee Soomaaliya.
2. Ilaa lagaa gaarayo heshiis qaran oo dhammaystiran oo dhex mara Dowlad Goboleedka Jubbaland iyo Dowladda Federaalka ah ee Soomaaliya, dhammaan khayraadka dabeeciga ah ee Jubbaland dhulkeeda laga helo waxa iska leh dadka reer Jubbaland, waxaana amaana ahaan ugu ilaalinaya Dowladda Jubbaland. Sidaas awgeed, maaraynta iyo maamulka dhammaan macdanta iyo khayraadka kale ee dabeeciga ah, baaridda iyo hurumarintooduba waa masuuliyad aasaasi ah oo Dowladda Jubbaland leedahay. Dowladda Jubbaland kaliya ayaa iska leh awoodda bixinta rukhsadaha lagu baarayo, ama lagu hurumarinayo macdanta iyo khayraadka dabeeciga ah ee shidaalka, Dowladda Jubbaland ayaa masuul ka ah kormeerka hurumarinta khayraadka Jubbaland.
3. Arrimahan soo socoda waxa ka wada xaajoonaya Jubbaland iyo Dowladda Federaalka ah:
 - a. Khayraadka dabiiciga ah
 - b. Wadaagidda (Qaybsiga) dakhliga
 - c. Dhawridda deegaanka
 - d. Hiddaha iyo goobaha taariikhiga ah
 - e. Kaabayaasha dhaqaalaha
 - f. Ganacsiga dowlad goboleedyada ka dhexeeya
 - g. Duurjoogta
4. Dawlad Goboleedka Jubbaland waxaay mas'uul ka tahay:
 - a. Waxbrashada iyo xannaanada carruurta.
 - b. Caafimaadka iyo fayadhawrka guud iyo nadaafadda deegaanka.
 - c. Horumarinta beeraha iyo xannaanada xoolaha.
 - d. Bixinta shatiyada ganacsiga, ururinta canshuuraha iyo horumarinta ganacsiga yaryar iyo warshadaha.
 - e. Dowladda hoose iyo guriyeynta.
 - f. Ammaanka gudaha.
 - g. Kaabayaasha dhaqaalaha.
 - h. Khayraadka badda iyo badbaadada deegaanka.
 - i. Dalxiiska.

Qodobka 93^{aad}: Guddiga Madaxa Bannaan ee Xuduudaha iyo Doorashooyinka Jubbaland

1. Iyadoo ay wada xaajood ka samaynayaan Dawlad Goboleedka Jubbaland iyo Jamhuuriyadda Federaalka ah ee Soomaaliya, waxay Jubbaland aasaasi doontaa Guddiga Madaxa Bannaan ee Xuduudaha iyo Doorashooyinka Jubbaland si loo ilaaliyo xuduudaha Jubbaland,

dawladda goboleedkuna u noqoto xubin muhiim ah, oo ka mid ah Jamhuuriyadda Federaaliga ah ee Soomaaliya.

2. Guddigu wuxuu ka faa'iidayaan karaa: khubaro si ay baaritaanno iyo daraasaad u sameeyo. Waxayna daabacaan khariidado sida kuwa doorashooyinka, tiro-koobka iyo maamulka ee Jubbaland.
3. Guddigu waa inuu baaritaan ku sameeyo is beddelka deegaanka, bulshada, siyaasadda, dhaqaalaha, waxayna kala shaqaynayaan dawladda Federaalka Arrimaha Xuduudaha.
4. Guddigu waa xor, dhexdhexaad wuxuuna matalaa dhammaan Jubbaland.
5. Guddiga Xuduudaha iyo Doorashooyinka waxa uu kala shaqayn doona, kalana xaajoon doonaa sidii la isu waafajin lahaa arrimaha maamulka iyo sharciga ee Guddiga Madaxa Bannaan ee Doorashooyinka Qaranka, arrimahan waxaa ka mid noqon doona:
 - a. Qaabka loo samayn liiska cod bixiyeyaasha, diiwaan gelinta codbixiyeyaasha, diiwaan gelinta musharraxiinta, iyo xallinta khilaafaadka sharciga doorashooyinka.
 - b. Aasaasidda degmooyinka doorashada ee Jubbaland oo dhan.
 - c. Sugidda xuduudaha Jubbaland.
 - d. Diiwaan gelinta axsaabta siyaasadda iyo magacaabista saraakiishs tirinta codadka doorashada
 - e. Taageeridda doorashada madaxweynaha, Barlamaanka Jubbaland, iyo dawladdaha hoose
6. Waajibaadka kale ee guddigan waxaa ka mid ah:
 - I. La shaqaynta khubaro sameeya baaritaanno iyo cilmi baaris ay ka ka mid yihin samaynta khariidadaha loo isticmaalayo doorashada, tirinta dadka iyo maamulka Jubbaland.
 - II. Samaynta daraasado ku aaddan is beddelka ku yimadda cimilada tirada dadweynaha ee degaanaada
 - III. Guddiga Xuduudaha iyo Doorashooyinka waxay ka koobanyihiin toddoba (7) xubnood oo ay soo jeedinayaan Golaha Xukuumadda, waxaana ansixinaya Baarlamaanka.
 - IV. Xeer gaar ah ayaa nidaaminaya hawlaha iyo waajibaadka Guddiga Xuduudaha iyo Doorashooyinka.

CUTUBKA 8^{aad}: Qodobbada Kama Danbaysta Ah

Qodobka 94^{aad}: Guddiga Arrimaha Sharciga, Dib u Eegista iyo Dhaqangelinta Dastuurka

1. Waa in la aasaasaa Guddiga Baarlamaaniga ah ee Dib u Eegista iyo Dhaqangelinta Dastuurka. Guddigu waxa uu dib u eegis ku samaynayaa dastuurka Jubbaland ee ay ansixiyeen ergadu.
2. Guddiga Dib u Eegista iyo Dhaqangelinta Dastuurku waxa ay
 - a. Ka shaqeeyaany is waafejiyaan dastuurka Jubbaland iyo kan Dawladda Federaalka ee Soomaaliya.
 - b. Guddigu waxa ay talo ka dalbi doonaan ururada bulshada rayidka ah, garsoorka iyo Golaha Fulinta
 - c. Adeegsadaan khubarada Soomaaliya jooga iyo meelaha kale ee caalamka dimuqraadiga ah.
 - d. Guddigu waxa ay samayn doonaan talooyin ay u jeedin doonaan Barlamaanka Jubbaland. Kuwaas oo barlamaanku ka doodi doono ka hor inta aan lagu ansixin afti.

Qodobka 95^{aad}: Wax ka Beddelka Dastuurkan

1. Wax kabeddelidda dastuurkan waxaa soo jeedin kara:
 - a. Afar meelood halmeel (1/4) Golaha Baarlamaanka.
 - b. Golaha Wasiirrada
 - c. Ugu yaraan 5,000 oo qof oo codbixiyeyaal ah.
2. Ka dib marka barlamaanka loo soo gudbiyo hindisaha wax ka beddelka dastuurka, waa in ay ka baaraan degaan Guddiga Dib u Eegista iyo Dhaqangelinta Dastuurku. Barlamaanka Jubbaland waa in u ku ogolaadaa ka doodista hindisihii iyo talooyinkii ay soo gudbiyeen Guddigu cod hal dheeri ah (50%+1).
3. Barlamaanka Jubbaland waxa u samayn doonaa guddiyo baarlamaani ah oo dhageysta aragtida dhammaan dadka iyo ururada danaynaya.
4. Waa in dadka lagu wacyi geliyo barnaamij ku aaddan hindisaha wax bedelka distoorka. Taas oo uu qabanayo baarlamaanka Jubbaland si bulshada loo ogeysiyo dhammaan wax ka beddelka lagu samaynayo Dastuurka Jubbaland.
5. Muddo aan ka yarayn bil Baarlamaanka Jubbaland waa in cod u qaadaan hindisaha wax ka bedelka si baarlamaanku ugu ansixiyo aqlabiyadda 2/3 (seddex meelood laba meel) tirada guud ee xildhibaanada Jubbaland.
6. Wax ka beddelka dastuurka marka la ansixiyo waa in lagu daabacaa faafinta rasmiga ah, lagumana diidi karo diidmada qayaxan ee Madaxweynaha.

Qodobka 96^{aad}: Dhaqangelinta Dastuurka


1. Dastuurka Dawlad Goboleedka Jubbaland waa in si rasmi ah loo ansixiyaa ka dib marka loo qaado afti lagu xaqiijinayo ogolaanshaha reer Jubbaland. Aftidaasi waxa ay noqon kartaa mid guud ama mid ergo.
2. Muddada aftida Dastuurkani wuxuu dhaqangelayaa maalinta ay ansixiyaan Ergooyinkii Ansixinta Dastuurka.

Qodobka 97^{aad}: Axdiga Ku Meel Gaarka ah ee Jubbaland

1. Dastuurkani waxa uu tirtirayaa Axdigii Ku Meel Gaarka ahaa ee Dawlad Goboleedka Jubbaland ee Soomaaliya.

LIFAAQYADA

JEDWALKA KOOWAAD: KHARIIRADA DAWLAD GOBALEEDKA
JUBBALAND



JEDWALKA LABAAD: CALANKA DAWLAD GOBALEEDKA JUBBAL-
AND



JEDWALKA SEDEXAAD: ASTAANTA DAWLAD GOBALEEDKA
JUBBALAND



